

ԳԵՎՈՐԳ ՍՏԵՓԱՆՅԱՆ

ԿՐԹԱԿԱՆ ԳՈՐԾԻ ՍԿԶԲՆԱՎՈՐՈՒՄԸ ԳՈՐԻՍՈՒՄ. ՍԲ ՀՈՒՓՍԻՄԵՒ ԵԿԵՂԵՑԱԿԱՆ-ԾԽԱԿԱՆ ԴՊՐՈՑԻ ՊԱՏՄՈՒԹՅՈՒՆԻՑ (1890-1920 ԹԹ.)

Ձանգեգուրի գավառակենտրոն Գորիսում Սբ. Հռիփսիմե եկեղեցական-ծխական դպրոցը հիմնադրվել է 1890-1891 թթ. ուսումնական տարում: Հիմնադրումից ի վեր՝ դպրոցը նվիրվել է բացառապես ազգագուտ գործունեության՝ կրթելով ու դաստիարակելով բազմաթիվ երեխաների: Դպրոցի գործունեությունը որոշակի կանոնակարգված հիմքերի վրա է դրվել, երբ ավագ ուսուցչի պաշտոնը ստանձնեց ծնունդով գորիսեցի, XX դարասկզբի բազմաշնորհ ու լուսամիտ գործիչ մանկավարժ, հրատարակիչ-խմբագիր Սիմեոն Տեր-Մինասյանը: Ընդհանրացնելով Սբ. Հռիփսիմեի եկեղեցական-ծխական դպրոցն անգնահատելի դեր է ունեցել ոչ միայն Գորիսի, այլև ամբողջ գավառի կրթամշակութային կյանքում:

***Բանալի բառեր՝** Գորիս, Սբ. Հռիփսիմե, եկեղեցական-ծխական դպրոց, ավագ ուսուցիչ, հոգաբարձուների խորհուրդ, Կենտրոնական դպրոց:*

Սյունյաց պատմական Հաբանդ գավառի Ձազաձորի հովտի Վարարակն գետի ձախափնյակում՝ Լաստի խութ լեռան հյուսիսային լանջերն ակոսող գեղատեսիլ ձորակում, XVIII դ. 60-ական թվականների վերջերին Մեծ Մելիք-Օհանի կողմից Ղարաբաղի խանության ենթակայությամբ հիմնարկվել է մելիքանիստ կիսաանձավային Գորիս-Կյորես գյուղը: Պատմահնագիտական նյութերն ապացուցում են, որ տակավին վաղ ժամանակներից այդտեղ գոյություն է ունեցել բնակավայր: Բնակատեղիի հեռավոր անցյալի վկաներից է գյուղից հյուսիս-արևելք՝ լեռնալանջի բարձրության վրա, «Ճգնավորաց» լեռան ստորոտում գտնվող կիսաժայռափոր Սբ. Մարտիրոս մատուռը (X-XI դդ.), որը եղել է մտում է տարածաշրջանի նշանավոր սրբատեղիներից մեկը: Նորահիմն բնակավայրում Մելիք-Օհանի ձեռնարկած շինարարական-կառուցողական աշխատանքները նախ սկսվում են ամրոցակերպ մելիքական նստոց-կենտրոնի՝ ապարանքի կառուցմամբ: Մելիք-Օհանի շինարարական գործունեության հաջորդ ձեռնարկը՝ եկեղեցաշինությունն էր: Նա «Խաչերի ձոր» թաղում փոքրիկ բլրալանջի վրա, 1776 թ. կառուցում է Սբ. Հռիփսիմե եկեղեցին¹: Ձեռագրական

¹ Տեղին նշենք, որ Գորիս գյուղի հուշարձանների արձանագրությունները հրատարակած Մեսրոպ արքեպս. Տեր-Մովսիսյանի և Սեդրակ Բարխուդարյանի մոտ հիշատակված չեն սույն եկեղեցու կառուցման վերաբերյալ որևէ վիճաբանական տեղեկություն: Այդ բացը լրացվեց 2006 թ. հուլիսի 15-ին, երբ տողերիս հեղինակի ղեկավարությամբ և վիճաբանության դասախոս Արտակ Գզոյանի մասնակցությամբ Գորիսի պետական համալսարանի պատմության ֆակուլտետի 1-ին կուրսի ուսանողների հնագիտական և վիճաբանագիտական պրակտիկայի ժամանակ ուսանողների ջանադիր աշխատանքի արդյունքում ամբողջությամբ մաքրվեց գոմի վերածված եկեղեցին, բացվեց քարապատված արևմտյան դուռը, սվաղի հաստ շերտից մասամբ մաքրվեցին նաև պատերն ու մույթերը: Հարավային մուտքի բարավորի սվաղը մաքրելու ժամանակ բացվեց եկեղեցու հիմնման մինչ այդ անհայտ մնացած պարզ, փոքրիկ կցագրերով քառատող հետևյալ արձանագրությունը. «ՅԻՇԱՏ[Ա]Կ Ե/ԵԿԵՂԵՑԻՍ ՊԱՂԸՐԻ ՈՐԴԻ ՄԵԼԻՔ/ՈՒՀԱՆԻՆ: ԹՎ [Ի]Ն ՈՄԻԵ (1776)» (**Ստեփանյան Գ.**, Գորիս, Դաշտային հետազոտական կյութեր (2006 թ.), տետր № 1, էջ 2): Արձանագրությունը հրատարակվում է առաջին անգամ:

աղբյուրները փաստում են, որ XVIII դ. 80-ական թվականների սկզբներին Գորիս գյուղը տակավին համարվում էր Տաթևի վանքի վանքապատկան գյուղերից մեկը: 1823 թ. դրությամբ գյուղն ուներ 118 ծուխ¹: Համայնքի սոցիալական կազմը պարզունակ էր. բաղկացած էր հիմնականում արտոնյալ ու հարկատու դասերից: Գյուղն ապրում էր սոցիալ-տնտեսական և հոգևոր-մշակութային բնականոն կյանքով:

Ինչպես արևելահայ մյուս գյուղերում, Գորիսում ևս կրթական կյանքն առաջ մղելու նախապայմաններ էին՝ լուսավորական գաղափարների տարածումը և դպրոցների բացումը: Լուսավորության հարցը մտահոգում էր բոլոր նրանց, ովքեր տոգորված էին հայրենիքին ծառայելու պատրաստակամությամբ: Այս առումով մեծ է հատկապես բնիկ գորիսեցի, հնահիմք Մինասանց տոհմից սերող, գյուղի ծխական քահանա Մինաս ավ. քին. Տեր-Մինասյանի դերը ոչ միայն հոգևոր-եկեղեցական գործունեության մեջ, այլև կրթական-լուսավորչական բնագավառում: Այսպես՝ արխիվային վավերագրերը փաստում են, որ Գորիս գյուղի առաջին և երախտաշատ մանկավարժը եղել է Մինաս ավ. քին. Տեր-Մինասյանը, որը, լինելով ժամանակի բազմակողմանի զարգացած առաջադեմ հոգևոր գործիչ և ուսումնասեր անձնավորություն, բացել էր մասնավոր կամ խալֆայական տիպի դպրոց, կրթել ու դաստիարակել գյուղի երեխաներին²: Դպրոցում ուսուցանվել են եկեղեցական պարզունակ գիտելիքներ պատարագի և ժամասացության մասին: Աշակերտը, դպրոցն ավարտելով, կարող էր կարդալ Աստվածաշունչը, երգել շարականներ: Այս դպրոցում ուսանած Մինասանց տոհմից սերող մեկ այլ նշանավոր հոգևոր գործիչ Հակոբ քին. Տեր-Մինասյանն իր հուշերում վկայում է. «Տողերիս գրողը դեռ 8 հասակից տուել են կարդալ գրել սովորելու, այն ժամանակը Չանգեզուրումը ոչ մի ուսումնարան [չի եղել], միայն Գորիս գիւղում և Խնծորեսկ գիւղում ծմբուկայ ժամանակները անհատ տիրացուներ ունենում էին ուսումնարան անուամբ: Իբրև ուսումնարան սովորեցնումին Սաղմոս, ժամագիրք և Աւետարան, մասամբ ռուսերեն: Ես էլ այստեղ էի սովորում»³:

Մինաս ավ. քին. Տեր-Մինասյանը, ով հայտնի էր որպես անբիժ և պարկեշտ հոգևորական, իր աստվածահաճո ու հայրենանվեր գործունեությամբ բարի համբավ է թողել սերունդների հիշողության մեջ: Լինելով գյուղի լուսավորիչը, իր մատուցած ծառայությունների շնորհիվ, նվաճել էր գյուղացիների սերն ու հարգանքը: Անգամ գյուղի միակ՝ Սբ Հռիփսիմե եկեղեցին, որտեղ տարիներ ի վեր նա քահանայագործել էր, հաճախ կոչում էին նաև նրա անունով: Որպես, օրինակ, Ս. Խանգադյանը «Հորս հետ և առանց հորս» ինքնակենսագրական վիպակում գրում է. «Մեր բերդաթաղի եզրին, որտեղ ժայռերը մի փոքր մեղմանում էին, սպիտակ պատերով եկեղեցի կա: Լրիվ սպիտակ: Ես զարմանում էի, թե ինչու են նրան սուրբ Մինաս ասում և ոչ թե Սպիտակ»⁴:

1868 թ. փետրվարի 19-ին Գանձակ-Ելիզավետպոլի նահանգի ստեղծումից

1 Տե՛ս Описание Карабагской провинции (Магал Тативский (б.с.), տե՛ս նաև Հայաստանի ազգային արխիվ (այսուհետ՝ ՀԱՎ), ֆ. 93, ց. 1, գ. 163, թ. 114-115:

2 Տե՛ս ՀԱՎ, ֆ. 56, ց. 15, գ. 31, թ. 19:

3 ՀԱՎ, ֆ. 798, ց. 1, գ. 1220, թ. 139:

4 **Խանգադյան Ս.**, Հորս հետ և առանց հորս (ինքնակենսագրական վիպակ), Երևան, 1986, էջ 9: Խորհրդային կարգերի հաստատումից հետո Սբ Հռիփսիմե եկեղեցին պատվել է սպիտակ կրաշաղախով, ինչը պարզ երևում է XX դարակեսին կատարված լուսանկարներում:

հետո, Գորիս գյուղաքաղաքը դառնում է Նորաստեղծ Չանգեզուրի գավառի վարչական կենտրոնը: XIX դարավերջին Գորիսն արդեն իսկ ապրում էր սոցիալ-տնտեսական և հոգևոր-մշակութային վերելք: 1869-1870 թթ. ուսումնական տարում հիմնված Սբ Ստեփանոսի¹ եկեղեցական-ծխական դպրոցը², որի առաջին ուսուցիչներից էր Մինաս ավ. քին. Տեր-Մինասյանի հիմնած դպրոցում ուսանած նրա թոռը՝ Սարգսի որդի Հովհաննեսը (Օհան): Հենց նրա ուսերին էր դրված պապի վառած ջահը վառ պահելու, նրա գործը շարունակելու ազգավեր առաքելությունը: Սյունյաց փոխանորդության առաջնորդ Հովհաննես արքեպս. Ասլանյանցի (1870-1873 թթ.)՝ 1872 թ. ապրիլի 1-ին կազմած և Էջմիածնի Սինոդին ներկայացրած «Ցուցակ Հոգևոր ուսումնարանաց եղելոց ի յաջորդութան Տաթևու» տեղեկագրում նշված է, որ «Կորիս գիւղաքաղաքի» ուսումնարանի ուսուցիչն էր Հովհաննես (Օհան) Տեր-Մինասյանը: Տեղեկագրի՝ «Անուանք ուսուցչաց, թե՛ ո՞ր Տերութան հպատակ են նոքա և ու՞ր կրթեալ» սյունակում գրված է. «Ցովհաննես Տեր-Մինասեանց Կորիսեցի, հպատակ Նոյն Տերութան, կրթեալ առ պապ իւր Մինաս քահանայն»³:

Չանգեզուրի առաջին գավառապետ Պյոտր Ստարիցկիի օրոք 1870 թ. Գորիս գյուղից արևմուտք, Վարարակն գետակի աջափնյա ընդարձակ և հարթ տարածության վրա հիմնվում է գավառակենտրոն Նոր Գորիսը: Բարձրադիր և զամիթափ լեռնալանջերի միջև ընկած փոքրաթեք դարավանդային տափարակն առավել հարմարավետ էր որպես քաղաքատեղի և ուներ ընդարձակման հեռանկար: Հնի և նորի սահմանագծում նորահիմն Գորիսում XIX դարավերջը նշանավորվեց ազգային ինքնագիտակցության բուռն վերելքով: Պայմաններ ստեղծվեցին կրթամշակութային զարգացմանը՝ իրենց բոլոր դրսևորումներով: Գորիսը թևակոխեց պատմական կյանքի մի նոր փուլ, որի զարգացման գրավականը անառարկելիորեն նոր առաջադեմ հայացքներն էին:

¹ Տե՛ս ՀԱԱ, ֆ. 7, ց. 1, գ. 157, թ. 1:

² Տե՛ս **Խուրդյան Ա.**, Արևելահայ դպրոցները 1830-1920 թթ. (Ժամանակագրությունը հավելյալ մանրամասներով), Երևան, 1987, էջ 118: Դպրոցում ավանդվել է հայերեն ընթերցանություն, վայելչագրություն, եկեղեցական երգեցողություն, կրոն և քերականություն (տե՛ս ՀԱԱ, ֆ. 56, ց. 15, գ. 31, թ. 19): Դպրոցը պահվել է ի հաշիվ «դրամոք ծնողաց աշակերտաց» (տե՛ս ՀԱԱ, ֆ. 56, ց. 15, գ. 31, թ. 39): Ի դեպ, այս դպրոցում է սովորել Ակսել Բակունցի հայրը՝ Ստեփան Թևոսի Բակունցը (տե՛ս **Բակունց Վ.**, Մեծ հույզերի սերմնացանը, Երևան, 1976, էջ 7): Որոշ դժվարությունների պատճառով դպրոցը որոշ ժամանակ դադարել է գործելուց: Վերաբացվել է միայն 1882 թ.՝ գավառապետ Անտոն Յակովլևիչ Կարան-Կարայանի (1878 թ.-1888 թ. հունիս) հրամանով (տե՛ս Չանգեզուրից, «Նոր-Դար», Թիֆլիս, 1884, սեպտեմբերի 4, N 140): 1885 թ. ամռանը Գորիս գյուղ (Նոր կամ Ներքին Գորիս) այցելած Ստեփան Չելինսկին (Մկրտչյան) վկայում է, որ գյուղն ուներ գործող ուսումնարան (տե՛ս Зелинский С., Экономический бытъ государственных крестьянь въ Зангезурском уезде Елисаветпольской губернии-и, «Материалы для изучения экономического быта государственных крестьянь Закавказскаго края» (այսուհետև՝ МИЭБГКЗК), т. IV, Тифлис, 1886, Тифлис, 1890, ր. 119): Դպրոցի՝ 1880-ական թվականների գործունեության վերաբերյալ ուշագրավ տեղեկություն է հայտնում Հովհաննես Պարոնյանը (Յապոն). «Այդ ժամանակ մեր գիւղի (Նոր կամ Ներքին Գորիսի - Գ. Ս.) այդ «շվուլ»-ը Ձագեծորի գիւղերի միակ դպրոցն էր, որտեղից Դավանի Շիկահող գիւղացի այեիներ Գրիգոր վարժապետը (Գրիգոր Տեր-Գրիգորյանը - Գ. Ս.) «լոյս ու գիտութիւն» էր տարածում իր կարողութան չափով: Ոչ ոք չէր յիշում, թե Գրիգոր վարժապետը ե՞րբ էր եկել մեր ծորը. ոչ ընտանիք ուներ, ոչ տնտեսութիւն. ապրում էր դարվիշի նման, օրը օրին, աշակերտներից ստացած հաց ու պանիրով, կամ պղնձե դրամներով: Ու մինչև իր կեանքի վերջն էլ նա մնաց Գորիս գիւղում՝ առաւօտից մինչև երեկոյ իր գլխին հաւաքած երեխաներին ժամագիրք, այբբենարան կարդացնելով, հաշիւ, գրել սովորեցնելով» (**Յապոնի (Ցովհաննես Պարոնյան)** յուշերը: Գրեց՝ **Տերու-Նի Զ. [Հակոբ Տեր-Պողոսյան]**, «Հայրենիք», Պոսթըն, 1940, ԺԹ տարի, դեկտեմբեր, N 2, էջ 115):

³ ՀԱԱ, ֆ. 56, ց. 15, գ. 31, թ. 19:

Գավառակենտրոնի առաջին ուսումնական հաստատությունը՝ 1876 թ. դեկտեմբերի կեսերից գործող պետական (արքունի) կամ «ռուսական» ուսումնարանն էր (Герюсинское казенное нормальное сельское училище)¹: Ա. Բակունցի պատկերավոր արտահայտությամբ՝ «Գորիսն ուներ մի թագավորական ուսումնարան՝ ռուսաց շկուր...»²: Բացման տարում ուսումնարանը եղել է միդասյա (երկդասյա է դարձել 1882 թ. հոկտեմբերի 1-ին)³ և ունեցել է 72 հայ և 1 ռուս աշակերտ⁴: Ուսումնարանում մեծ մասամբ սովորում էին բեկերի, վաճառականների և հոգևորականների երեխաները⁵: Ուսումնարանի պատվավոր վերակացուն էր Գորիսում և տարածաշրջանում մեծ հեղինակություն վայելող Մանուչար բեկ Մելիք-Հուսեփյանը⁶, որին հաջորդել է Իվան Սուլևսկի-Ռակուզան⁷: Ուսումնարանի առաջին տեսուչն ու ուսուցիչն էր Հովհաննես Ղազարի Տեր-Միքայելյանը⁸: Այնուհետև տեսուչ և ուսուցիչ են աշխատել Իվան Վենեդիկտի Բեսսարաբան⁹, կոլեգիական ռեգիստր Եփրեմ Մելիք-Շահնագարյանցը¹⁰, Միքայել Սերգեյի Պողոսյանը¹¹ և Իվանովը¹²: Ուսումնարանի գործունեությունն առանձնապես արդյունավետ էր վաստակաշատ մանկավարժ, տիտուլյար խորհրդական Սադաթ Սերգեյի բեկ Սաֆրազբեկյանի¹³ տեսչության տարիներին (1908-1914 թթ.)¹⁴: Տարբեր տարիների դպրոցում դասավանդել և գավառի կրթական գործում մեծ ավանդ են ներդրել ժամանակի ճանաչված մանկավարժներ Հարություն Հարությունյանը¹⁵, Սկրտիչ Սարգսյանը, Լևոն Միքայելյանը (Լևոն Սյունեցի), Բոգդան Բագդատևը, Բորիս Սկաբիչևսկին, Գեոր-

1 Տե՛ս **Зелинский С.**, նշվ. աշխ., МИЭБГКЗК, с. 121, տե՛ս նաև «Մշակ», Թիֆլիս, 1876, դեկտեմբերի 2, N 46, տե՛ս նաև Кавказский календарь на 1891 г. (այսուհետ՝ КК), отд. Адрес-календарь, с.181, տե՛ս նաև **Գրիգորյան Ա.**, Նախասովետական Չանգեզուրի դպրոցական կյանքից (1870-ական թթ.-1917 թ.), էջ 246:

2 **Բակունց Ա.**, Կյորես, Ընտրանի, էջ 374:

3 Տե՛ս **Зелинский С.**, նշվ. աշխ., МИЭБГКЗК, с. 121, տե՛ս նաև КК на 1893 г., Тифлис, 1892, отд. Адрес-календарь, с. 240.

4 Տե՛ս նույն տեղում:

5 Տե՛ս նույն տեղում:

6 Տե՛ս КК на 1884 г., Тифлис, 1883, отд. IV, с. 90.

7 Տե՛ս КК на 1893 г., отд. Адрес-календарь, с. 240.

8 Տե՛ս КК на 1878 г., Тифлис, 1877, ч. II, отд. II, с. 83, տե՛ս նաև КК на 1879 г., Тифлис, 1878, отд. III, с. 72.

9 Տե՛ս КК на 1884 г., отд. IV, с. 90.

10 Տե՛ս **Գ.Տ.Գ. [Գրիգոր Տեր-Գրիգորյան]**, Նամակ Գորիսից, «Մշակ», Թիֆլիս, 1890, նոյեմբերի 22, № 134:

11 Տե՛ս КК на 1899 г., Тифлис, 1898, с. 325.

12 Տե՛ս ՀՊԹ, Նոր և նորագույն պատմության բաժնի ֆոնդ, Գ.Գ., N 4197:

13 Սադաթ բեկ Սաֆրազբեկյանը (1860-1940 թթ.) եղել է Սիսիանի Բռնակոթ գյուղից Գորիսում հաստատված Մելիք-Սաֆրազբեկյանների շառավիղներից: Ավարտել է Շուշիի ռեալական ուսումնարանը: Կինն էր Սաթենիկ Հարությունյանը (1879-1959 թթ.): Ունեցել են հինգ տղա (Գևորգ, Արտո, Գուրգեն, Ալեքսանդր, Ջավադ) և մեկ դուստր՝ Թագուհին: Սադաթ բեկ Սաֆրազբեկյանը եղել է «Կովկասի Հայոց բարեգործական ընկերության» Գորիսի մասնաճյուղի անդամ (տե՛ս Տեղեկագիր Կովկասի Հայոց բարեգործական ընկերության 1909 թ. գործունեության, Թիֆլիս, 1910, էջ 54):

14 Տե՛ս КК на 1909 г., Тифлис, 1908, Адрес-календарь, с. 366, տե՛ս նաև КК на 1910 г., Тифлис, 1909, ч. II, Адрес-календарь, с. 394, տե՛ս նաև ՀՊԹ, Նոր և նորագույն պատմության բաժնի ֆոնդ, Գ.Գ., N 4197:

15 Տե՛ս նույն տեղում:

գի Շարոգրադսկին¹, Հովհաննես Գրիգորյանը², Սիմեոն Շահվերդյանը³, Խորեն քին. Մելիք-Դադայանը⁴, Սարգիս Մուսայեյանը⁵ և ուրիշներ:

* * *

Լուսավորության և Նոր սերնդի դաստիարակության գործը չէր սահմանափակվում միայն արդեն գոյություն ունեցող պետական դպրոցով, ուստի ժամանակը հրամայաբար պահանջում էր բացել եկեղեցական-ծխական կանոնավոր դպրոց, որն իր նպատակադրումով պետք է տարբերվեր պետական դպրոցից: Այդ հանգամանքն է, որ դրդեց գավառակենտրոնի ազգային լուսավորության գաղափարներով տոգորված առաջադեմ գործիչներին աշխատանքներ տանել ծխական դպրոց բացելու ուղղությամբ:

Թեև 1880-ական թվականների վերջերին գավառակենտրոնում գործում էր տիրացուների և քահանաների նախաձեռնությամբ բացված և ցարական իշխանությունների կողմից ոչ մի հսկողության չենթարկվող խիստ ցածր մակարդակ ունեցող մասնավոր ուսումնարան⁶ (փակվել է 1888 թ. սեպտեմբերին)⁷, սակայն այդտեղ հաղորդվող գիտելիքների չափն ու բովանդակությունը կախված էր «ուսյալ» վարժապետի խղճից ու կարողությունի: Ուշադրության է ար-

1 Տե՛ս ԿԿ 1880 թ., Թիֆլիս, 1879, Адрес-календарь, с. 83, տե՛ս նաև ԿԿ 1891 թ., Թիֆլիս, 1890, Адрес-календарь, с. 181, տե՛ս նաև ԿԿ 1893 թ., տե՛ս նաև ԿԿ 1900 թ., Թիֆլիս, 1899, Адрес-календарь, с. 346, տե՛ս նաև ԿԿ 1909 թ., Թիֆլիս, 1908, Адрес-календарь, с. 366, 373, տե՛ս նաև ԿԿ 1910 թ., Թիֆլիս, 1909, ч. II, Адрес-календарь, с. 394.

2 Տե՛ս Հայաստանի պատմության թանգարան, Նոր և նորագույն պատմության բաժնի ֆոնդ գլխավոր գույքամատյան, N 4197:

3 Տե՛ս **Յով. Դան. [Հովհաննես Դանիելյան]**, Լամակ Գորիսից, «Մշակ», Թիֆլիս, 1890, սեպտեմբերի 27, N 110, տե՛ս նաև **Ս.Շ. [Սիմեոն Շահվերդյան]**, Ճանապարհորդական նկատողություններ, «Նոր-Դար», Թիֆլիս, 1887, հոկտեմբերի 16, N 175:

4 Տե՛ս Նույն տեղում, տե՛ս նաև Հայաստանի պատմության թանգարան, Նոր և նորագույն պատմության բաժնի ֆոնդ գլխավոր գույքամատյան, N 4197, տե՛ս նաև **Հոսաղ [Հակոբ Տեր-Հակոբյան]**, Մեր գաւառի դպրոցները, «Աշխատանք», Թիֆլիզ, 1906, մայիսի 21, N 17, էջ 270: Խորեն քին. Մելիք-Դադայանը (1844-1940 թթ.) 1883 թ-ից եղել է Գորիս գյուղի և քաղաքի ծխատեր քահանան (տե՛ս «Գաւառ», Գորիս, 1910, ապրիլի 4, N 14): Իր իսկ վկայությամբ՝ «1883 թին ձեռնադրելով Գորիս գիւղի վերայ, մինչև օրս փոխ առ փոխ... հովել եմ Գորիս գիւղի և քաղաքամասի ծխերը: Իսկ 1904 թին երբ քաղաքամասի Ս. Լուսավորիչ եկեղեցին օժել է, այնուհետև ևս շարունակել ենք փոխ առ փոխ հովել գիւղիս Ս. Հռիփսիմէ և քաղաքի Ս. Լուսատրիչ եկեղեցիների ծխերը» («Գաւառ», Գորիս, 1910, մայիսի 2, N 17):

Խորեն քին. Մելիք-Դադայանի երկարատև եղեցական սպասավորության արգասավոր վաստակը գնահատվել է պատվո նշանով: Խրիմյան Հայրիկի՝ 1900 թ. ապրիլին արձակած Հայրապետական կոնդակով նրան շնորհվել է քահանայական լանջախաչ կրելու իրավունք (տե՛ս Դաշտոնականք: Քաղուածք կոնդակաց Վեհ. Հայրապետի, «Արարատ», Վաղարշապատ, 1900, N Ե, էջ 228):

5 Սարգիս Գրիգորի Մուսայեյանը (1901 թ. ավարտել է Գորի քաղաքի ուսուցչական սեմինարիան), ով հետագայում դարձավ բոլշևիկյան կուսակցության նշանավոր գործիչ, ուսումնարանում մարմնամարզություն է դասավանդել 1911 թ. սեպտեմբերի 8-ից: Մինչ այդ՝ նա ութ տարի որպես տեսուչ և ուսուցիչ է աշխատել Նուխի գավառի Սաբաթլու հայկական գյուղում (տե՛ս ՀԱՄ, ֆ. 1441, ց. 1, գ. 14, թ. 1-3): Ի դեպ՝ Գորիսում աշխատած տարիներին, Ս. Մուսայեյանը զբաղվել է նաև գրական գործունեությամբ, գրել է պիեսներ: «Չանգեզուր գալով,- ասվում է նրա կենսագրությունում,- նա կրկին նվիրվում է լուսավորական գործին և ուսուցչի պաշտոն ստանձնում: Ազատ ժամերին ընկեր Մուսայեյանը գրում է «Փախուստի վրա» կատակերգությունը և նկարագրում է Նույնպես գանգեզուրցիների և լեռնային դարաբաղցիների բարքերն ու կենցաղը» (Ընկեր Սերգեյ Մուսայեյան (կենսագրական ակնարկ), «Խորհրդային Հայաստան», Երևան, 1923, օգոստոսի 15, N 178):

6 Տե՛ս **Ս. Շ. [Սիմեոն Շահվերդյան]**, Գեօրեսից, «Նոր-Դար», Թիֆլիս, 1888, փետրվարի 12, N 17:

7 Տե՛ս **Ս. Շ. [Սիմեոն Շահվերդյան]**, Գեօրիս, «Նոր-Դար», Թիֆլիս, 1888, սեպտեմբերի 30, N 159:

ժանի պետական դպրոցի ուսուցիչ Սիմեոն Շահվերդյանցի՝ «Նոր-Դարում» գետեղած թղթակցությունում Գորիսում և հարակից գյուղերի (Քարահունջ, Տեղ, Խնձորեսկ) մասնավոր ուսումնարանների վերաբերյալ բնութագրումը. «...ինչպես նկատում ենք, մի քանի ամսից յետոյ այդ սուսկի նման բուննող ուսումնարանները ծխի նման էլ անհետանալու են, որովհետև շինած են ավազի վերայ՝ մի քանի գիւղացիների ձեռքով և ոչ ոք չկայ, որ այդ մի քանի գիւղացիների ձեռքերի հետ միացնէ և միւս գիւղացիների ձեռքերն և ուսումնարանը շինէ ամուր ապառաժի վերայ»¹:

Կանոնավոր դպրոցի բացման ուղղությամբ առաջին քայլերը ձեռնարկվեցին 1887 թ.: Նախաձեռնողն էր Երևանի թեմի Սյունյաց փոխանորդության առաջնորդ Անանիա վրդ. Համագասայանը (1887-1893 թթ.)²: Այդ նպատակադրումով նա Գորիս և հարակից գյուղեր է ուղարկում ճեմարանավարտ մի երիտասարդի, որը, սակայն, հանդիպելով մասնավոր ուսումնարանի «...մղոսի ուսուցչի» արգելքներին, ստիպված է լինում ձեռնունայն վերադառնալ³:

Չնայած դրան՝ գավառակենտրոնի առաջադեմ հայացքներ ունեցող մտավորականներն ու ուսման հարգը գնահատող մի քանի հանրաճանաչ մարդիկ չնահանջեցին իրենց դիրքերից: Եկեղեցական-ծխական դպրոց բացելու ուղղությամբ լուրջ քայլեր ձեռնարկեց ժամանակի ճանաչված մտավորականներից մեկը՝ պետական դպրոցի ուսուցիչ Սիմեոն Շահվերդյանցը, որին աջակցում էին նույն դպրոցի կրոնուսույց Խորեն քին. Մելիք-Դադայանը, Պարոնյան մեծահարգ տոհմից սերող կոլեգիական քարտուղար Հարություն բեկ Պարոնյանցը⁴, Սերգեյ Միրումյանը և Բալի Հարությունյանը⁵, լուսավորելու միջոցով առաջադիմության հասնելու նրանց սկզբունքը գավառահայ իրականության համար նորություն էր և հեղաշրջիչ նշանակություն ունեցավ:

Թեև դպրոցի բացման համար գորիսեցի երևելիներից ընտրվել էր հոգաբարձուների խորհուրդ, այսուհանդերձ, խնդրի լուծումը ձգձգվում էր: Ս. Շահվերդյանը «Նոր-Դարին» 1888 թ. նոյեմբերին հղած թղթակցության մեջ գրում էր. «Ահա մի տարին լրանում է, որ հարց է բարձրացրած Գեորիսում հայոց ծխական ուսումնարան բանալու մասին: Քանի գործը տաք էր՝ հոգաբարձուներ ընտրեցին, եկեղեցում այդ մասին քարոզներ ասացին, առաջին տպաւորութեան տակ ինչե՛ր չպատահեցան: Թէ գիւղացիները ինչպես վերաբերուեցին դէպի ուսումնարանի բացման գործը՝ անելորդ է ասել. միայն դժբաղդաբար, մինչև այժմ գործը մի մխիթարական ելք չէ ստացել»⁶: Դպրոցի հիմնմանը ձեռնամուխ վերոնշյալ «ուսումնասեր զաւակների ջանքով և հոգսով» 1889 թ. հունվարի 7-ին Սբ Հռիփսիմե եկեղեցում մեծաթիվ ծխականների մասնակցությամբ հրավիրված ժողովում, քահանայի քարոզից հետո, հավաքվածները միահամուռ ստորագրում են՝ «...համախօսական վճիռը երկդասեան դպրոց բանալու, յատկացնելով դպրոցին 2000 ռ. արդիւնք բերող հողերը ամեն մի տա-

1 **Ս. Շ. [Սիմեոն Շահվերդյանց]**, Գեորեսից, «Նոր-Դար», Թիֆլիս, 1888, փետրվարի 12, N 17:

2 Տե՛ս **Արտակ եպս. Սմբատեան (Տաւուշեցի)**, Համառօտ պատմութիւն Տաթևի վանքի, «Տաթև» (Տարեգիրք գրականութեան եւ արուեստի), 2 տարի, Հայէպ-Սուրիա, 1930, էջ 350:

3 **Ս. Շ. [Սիմեոն Շահվերդյանց]**, Գեորիս, «Նոր-Դար», Թիֆլիս, 1888, յունիսի 28, N 103:

4 Տե՛ս **Յով. Դան. [Հովհաննես Դանիելյան]**, Նամակ Գորիսից, «Մշակ», Թիֆլիս, 1890, սեպտեմբերի 27, N 110:

5 Տե՛ս Գեորիսից, «Նոր-Դար», Թիֆլիս, 1889, յունվարի 18, N 5:

6 **Ս. Շ. [Սիմեոն Շահվերդյանց]**, Գեորիս, «Նոր-Դար», Թիֆլիս, 1888, նոյեմբերի 24, N 197:

րի շարունակ տալով ուսումնարանին»¹: Հօգուտ նոր կառուցվող դպրոցական շենքի, ժողովականների կողմից տրամադրվում է 300 դեսյատին վարելահող, իսկ մեծահարուստները խոստանում են դրամով օգնել²:

Սակայն ծխական ժողովի կայացրած որոշման իրականացումը ինչ-ինչ պատճառներով անորոշ ժամանակով ձգձգվում է: Ինչպես ասվում է Գորիսից «Նոր-Դարին» ուղարկված թղթակցությունում, «Չարմանալի մարդիկ են գետրիսեցիները, այնքան հարստութիւն, այնքան փող ունեցող անձերն ամենևին ուշք չեն դարձնում իրենց զաւակների ուսման վրայ: Անցեալները տաք տաք բարձր բարձր խօսում, գոռում գոչում էին փողոցներում այդ հարուստները, ուսումնարանի բացման համար փող էին հաւաքում, հանգանակութիւն էին անում, բայց բոլորը իզուր անցաւ. մեծ մեծ խօսողները այսօր լուռ ու մունջ նստած են...»³:

Հուսահատությունը չէր պատել միայն նախաձեռնող խմբի անդամներին, ովքեր անդուլ ջանքերով շարունակում էին կիսատ մնացած գործը ավարտին հասցնել: Հովի. Դանիելյանը Գորիսից «Մշակին» ուղարկած թղթակցությունում գրում է. «Թեպետ այդ անձինքները զանազան տեսակ մարդկանց կողմից կամայականութիւնների և արգելառիթների հանդիպեցան, բայց միևնոյն ժամանակ, չը յուսահատվելով, սկսեցին ամեն ջանք գործ դնել, տոկոսութեամբ և եռանդով աշխատել, հասկացնելով ժողովրդին ուսման բարձր նշանակութիւնը...»⁴:

Եվ, ահա, շուրջ երեք տարի տևած ջանադիր աշխատանքների արդյունքում, բազում դժվարությունների հաղթահարումով գործը գլուխ է բերվում: Դրանում իր մեծ ներդրումն է ունեցել Երևանի թեմի փոխառաջնորդ⁵ Սուքիաս եպս. Պարզանցը⁶, որը կրթալուսավորական բազմարդյունք գործերով և իբրև մեկենաս բազմաթիվ հրատարակությունների՝ հայ եկեղեցու պատմության մեջ թողել է ուսումնասերի, շինարարի և, առհասարակ, «ազգային-եկեղեցական իրաւանց պաշտպանի» բարի համբավ⁷: Սուքիաս եպս. Պարզանցի՝ Մակար Ա Թեղուտեցուն 1890 թ. մարտի 28-ին հղած գրությունում դպրոցի բացման և ժողովրդի ընտրությամբ հոգաբարձուների խորհրդի ձևավորման մասին ասվում է. «Ի հետևումն գրութեան Դիւանատան Ձերդ Սրբութեան ի 10 Յունվարի տարւոյս ընդ համարաւ 4, առաջադրութեամբ ի 13 այնր ամսոյ համարաւ 64, պահանջեցի ի Փոխանորդէ նօրին Սիւնեաց զկանոնաւոր ընտրողաթաղի պատգամաւորաց, հոգաբարձուաց և անձնափոխանորդաց կոցին ի կառավարութիւն երկդասեան տղայոց նորոգ բանալի վարժարանին Գորիսու և ընկալայ ընդ յայտարարութեան նորին ի 21 ամսոյս ընդ համարաւ 24:

2) իշատակեալ ընտրողագիրսն հանդերձ համախօսական վճռագրովք հա-

1 Տե՛ս Գորիսից, «Նոր-Դար», Թիֆլիս, 1890, փետրուարի 6, N 15:

2 Գետրիսից, «Նոր-Դար», Թիֆլիս, 1889, հոկտեմբերի 25, N 177:

3 Նույն տեղում:

4 **Յով. Դան. [Հովհաննես Դանիելյան]**, Նամակ Գորիսից, «Մշակ», Թիֆլիս, 1890, սեպտեմբերի 27, N 110:

5 Երևանի թեմի առաջնորդ համարվում է Ամենայն Հայոց կաթողիկոսը (տե՛ս **Ներսես վրդ. Մելիք-Թանգեան**, Հայոց եկեղեցական իրաւունքը, գիրք Ա, Շուշի, 1903, էջ 690):

6 Սուքիաս եպս. Պարզանցը Երևանի թեմի փոխառաջնորդ է կարգվել 1887 հունվարի 3-ին և պաշտոնավարել է մինչև 1890 թ. օգոստոսի 27-ը: Նույն թեմում երկրորդ անգամ փոխառաջնորդ է կարգվել 1899 թ. հոկտեմբերի 26-ից մինչև 1903 թ. սեպտեմբերի 11-ը (տե՛ս **ՀԱՅ**, Սուքիաս արքեպս. Պարզեան, «Հայրենիք», Թիֆլիս, 1908, հոկտեմբերի 14, N 18):

7 Տե՛ս **Գիւտ Ա. Զ. Աղանեանց**, Էջմիածնի համագումար ժողովին, «Հայրենիք», Թիֆլիս, 1908, հոկտեմբերի 20, N 19:

սարակութեանն Գորիսու վասն ապահով պահպանութեան նորոգ բանալի վարժարանին ընդ այսմիկ մատուցանելով ի բարենկատողութիւն Ձերդ Վեհափառութեան՝ ամենախոնարհաբար խնդրեմ զբարեհաճ տնօրէնութիւն Հոգևոր Տեառնդ վասն տալոյ զիրաման բացման երկդասեան, արականաց դպրոցի ի յիշատակեալ աւանի և հաստատելոյ ի պաշտաման Հոգաբարձութեան զբարեկրօն խորէն քահանայն Մելիք-Դադայեանց, զերեսփոխան Բաղդասարն Մարգարեան, զպարոնայս Հայրապետ Բաղդեան և Յովհաննես Յարութիւնեան Մըկրտչեանց, իսկ ի պարտաւորութիւն անձնափոխանորդութեան զպարոնայս Խաչատուր Շափաղաթեան և զՄանուչարն Սափեան:

Ձերդ սրբազնասուրբ քահանայապետութեան
շնորհ ունիմ լինել մշտական
ամենախոնարհ ծառայ
Սուրբաս եպիսկոպոս»¹:

Ամենայն Հայոց կաթողիկոս Մակար Ա Թեղուտեցու 1890 թ. ապրիլի 6-ի թիվ 154 կոնդակով հիմնադրվում է Սբ. Հռիփսիմե՝ եկեղեցական-ծխական երկրայայ (4-ամյա) արական դպրոցը³: Կոնդակում ասվում է. «Կոնդակ Վեհա-

1 Գորիսի երկրագիտական թանգարան: Մ. Մ., N 3216:

2 Տե՛ս ՀԱԱ, ֆ. 7, ց. 1, գ. 157, թ. 1, տե՛ս նաև գ. 16, թ. 37, տե՛ս նաև «Մշակ», Թիֆլիս, 1890, ապրիլի 17, N 42: Հայտնի է, որ Հռիփսիմյան և Գայանյան անուններն են կրել Հայաստանում XIX դարում բացված օրիորդաց դպրոցները և գիմնազիաները: Արական դպրոցը Սբ Հռիփսիմեի անունով կոչելը փաստում է այն իրողությունը, որ Սյունիքում, Հայոց սրբերի շարքում, Հռիփսիմե նահատակի հանդեպ եղել է մեծագույն պաշտամունք:

3 Ի դեպ՝ նշենք, որ դպրոցի հիմնադրման հարցին անդրադարձած ուսումնասիրողներից Ս. Հախվերդյանը, վկայակոչելով Հայաստանի ազգային արխիվում պահվող գործերից մեկը (ֆ. 56, ց. 3, գ. 627, թ. 38), գրում է, թե իբր «Գորիս քաղաքի հայկական դպրոցը հիմնադրվել է 1884 թ.՝ ռուսականից շուրջ տասը տարի հետո» (**Հախվերդյան Ս.**, Գորիսի ամփոփ պատմություն, Երևան, 2005, էջ 197): Ըստ Ս. Հախվերդյանի վկայաբերած տեղեկության՝ ստացվում է, որ Գորիսում արքունի դպրոցը հիմնադրվել է 1874 թ.: Մինչդեռ վերը նշված տարաբնույթ սկզբնաղբյուրները փաստում են, որ պետական (արքունի) դպրոցը հիմնադրվել է ոչ թե 1874, այլ՝ 1876 թ.: Ս. Հախվերդյանի մատնանշած փաստաթուղթն ընթերցելու համար, որի իսկությունն ու հավաստիությունը Էապես կարող էր նպաստել հարցի պարզաբանմանը, ՀԱԱ-ում նույնպես ուսումնասիրեցինք վերոնշյալ գործը: Սակայն տարակուսելի այն էր, որ 1876 թ. վերաբերող և ընդամենը 11 թերթից բաղկացած «Թիֆլիս քաղաքի բնակիչներ Միրխանամյանցի և Մարիամ Փորխյանցի ամուսնության թույլտվություն տալու մասին» վերոտառությամբ գործում իսպառ բացակայում էր որևէ տեղեկություն ոչ միայն հայոց ծխական դպրոցների, այլև ընդհանրապես Գորիսի մասին:

1884 թ. Գորիսում չի գործել ծխական դպրոց, վկայվում է Գորիսից «Նոր-Դարին» հղած թղթակցությունում. «Մինչև այսօր Տաթևու վիճակի կենդրոնատեղում, այն է Կորիսում մի փոքրիկ ծխական դպրոց չը կայ և նա (Սյունյաց փոխանորդության առաջնորդ Հովհաննես վրդ. Ղալամյանը - Գ. Ս.) այդ մասին բնաւ չէ հոգում» (Կորիսից (Սիւնեաց նահանգ), «Նոր-Դար», Թիֆլիս, 1884, սեպտեմբերի 4, N 140): Ընդգծենք, որ 1884 թ. Գորիսում ծխական դպրոց չէր կարող բացվել հենց միայն այն պատճառով, որ կայսր Ալեքսանդր 3-րդի կողմից 1884 թ. փետրվարի 16-ին «Հայ լուսավորչական եկեղեցական ուսումնարանների մասին կանոնների» հաստատումից հետո, երբ ցարական իշխանություններն էլ ավելի խստացրին հայոց դպրոցները պետական հսկողության տակ առնող կարգը, Սինոդի՝ հրահանգը կատարելու մերժման և հայ հասարակության ընդվզման, ուժեղ շարժման ու հակամարտության պայմաններում չէր կարող հիմնվել որևէ նոր դպրոց: Հետևանքը եղավ այն, որ 1885 թ. մարտից կյսրկովկասի, Նոր Նախիջևանի և Բեսարաբիայի մեջ փակվեց մոտ 300 դպրոց (տե՛ս **Քամալեանց Ս.**, Դպրոցները փակելու օրերից, «Լուսնայ», Թիֆլիս, 1907, N 3-4, էջ 52):

Մեր ուսումնասիրությունները հիմք են տալիս արձանագրելու, որ զավառակենտրոն Գորիսում ծխական երկրայայ արական դպրոցը հիմնադրվել է 1890-1891 թթ. ուսումնական տարում: Այս եզրահանգումը հիմնված է մի շարք փաստերի վրա: Այսպես՝ դպրոցի 1892-1897 թթ. ավագ ուսուցիչ Գեղեհն Տեր-Մինասյանի 1895 թ. սեպտեմբերի 24-ին Երևանի թեմի առաջնորդ Անանիա եպյ. Համազասպյանին ուղարկած զեկուցագրում ասվում է. «Գորիսի հայոց եկեղեցական-ծխական դպրոցը գոյութիւն ունի 5 տարուց ի վեր, բացուել է 1890 թուի հոկտեմ-

փառ Հայրապետի Ազգիս ի 6 Ապրիլի թ. 154, որով ընդարձակեցան իրաւունք Փոխ-թեմակալին Հայոց Երեւանայ բանալ ի Գորիս աւանի եկեղեցական ծխական երկդասեան տղայոց ուսումնարան և հաստատեցան ի պաշտօն հոգաբարձութեան վասն այնորիկ ուսումնարանին՝ Բարեկրօն Խորէն քահանայն Մելիք Դադայեանց, երեցփոխանն եկեղեցւոյ տեղւոյն և յարգելիք՝ Հայրապետն Բաղրեան և Յովհաննէսն Յարութիւնեան Մկրտչեանց. իսկ ի պաշտօն անձնափոխանորդաց՝ պատուելիք՝ հաչատուրն Շափաղաթեանց և Մանուչարն Սափեան»¹:

Հատկանշական է այն հանգամանքը, որ դպրոցի բացման գործին նախանձախնդրորեն ձեռնամուխ էին հատկապէս դրսեկները կամ, ինչպէս տեղաբնակներն էին նրանց կոչում «օտարական հայերը»²: Մերվելով տեղի բնակչութեանը՝ նրանց շարքերում եղած արվեստասերներն իրենց ակտիվ մասնակցութիւնը ցուցաբերեցին գրական-մշակութային միջոցառումների կազմակերպմանը: Բացվելիք դպրոցին նյութապէս աջակցելու նպատակով վերջիններիս կողմից կազմված թատերական խումբը 1890 թ. ապրիլի 8-ին ներկայացնում է «Ա՛յ քեզ օյին» (Գ. Երիցփոխյան) և «Կըռթ-Կըռթ» (Վ. Մադաթյան) վոդևիլները և ստացված հասույթն ամբողջովին տրամադրում նորահիմն դպրոցի հոգաբարձական խորհրդին: «Դահլիճը հանդիսականներով լցվել էր: Գոյացած 100 թուրքու մուտքը վաղօրօք յատկացրած էր Գորիսում բացվելի երկդասեան հայոց ծխական դպրոցի օգտին, որի համար արդէն խնդրագիր է մատուցված վեհափառ Կաթողիկոսին»³, գրում է «Մշակը»: Միջոցառմանն իրենց մասնակցութիւնն էին բերել գավառապետ Իվան Սուլչեսկի-Ռակուզան (1888 հուլիս-1894)⁴, գավառային բժիշկը, հաշտարար դատավորները և պրիստավները: «Նրանք բոլորը,- գրում է «Մշակը»,- շատ լաւ գիտէին, որ այդ ներկայացումը ուրիշ քաղաքներում իրանց տեսածների հետ համեմատելով՝ չնչին բան է, բայց հասկանալով թէ ներկայացման մուտքը յատկացրած է բացվելի ուսումնարանին, չը զլացան իրանց լուման զցելու այդ հանրօգուտ նպատակի համար»⁵: Չարմանալի է, որ շնորհակալ այդ գործի հանդեպ պասիվ դիրք էին բռնել տեղի ունեւորները: «Իսկ բուն գորիսեցիները,- գրում է «Մշակը»,- մանաւանդ հարուստները, բացարձակապէս մերժում էին տոմսակ վերցնել, անտես առնելով

բերի 10-ին» (ՀԱՄ, ֆ. 7, ց. 1, գ. 142, թ. 21): 1910-1911 թթ. ուսումնական տարվա՝ «Երևանի թեմի եկեղեցական-ծխական դպրոցների դրամական, ուսուցիչների, աշակերտների, հոգաբարձուների և ծառայողների ընդհանուր տեղեկագրում», «Դպրոցը ո՞ր թուին է հիմնուել և ո՞ր թուին վերաբացուել» հարցը պարունակող սյունակում Գորիսի դպրոցի հիմնադրման տարեթիվ է նշված 1890 թ. (տե՛ս ՀԱՄ, ֆ. 7, ց. 1, գ. 157, թ. 1): «Գաւառ» շաբաթաթերթի 1910 թ. հունվարի 17-ի համարի լրատվութեան բաժնում պահպանված մի ուշարժան տեղեկութեան մեջ ասվում է. «Այս տարի լրանում է ծխական դպրոցի 20-ամեակը: Այդ առթիւ հաստատապէս իմացանք, որ աւագ-ուսուցիչ պ. Սիմ. Տէր-Մինասեանը մօտ օրերումս հասարակութեան առաջաւորների մասնակցութեամբ խառն ժողով պիտի գումարի որոշելու այդ յօբելէանը հանդիսաւոր տօնելու համար» («Գաւառ», Գորիս, 1910, յունւարի 17, N 3): Իսկ նույն դպրոցի երկարամյա ուսուցիչ Տ. Սազանդարյանը Շուշիում հրատարակվող «Ղարաբաղ» լրագրին տված թղթակցութիւնում սրբագրում է. «Հայոց եկեղեցական ծխական դպրոցը, որ գոյութիւն ունի 1890 թ.» (**Սազանդարեան [Տ.]**, Գորիս (համառոտակի ուսումնասիրութիւն), «Ղարաբաղ», Շուշի, 1912, յունւարի 29, N 8):

1 Պաշտօնական: Քաղուածք կոնդակցա Վեհափառ Հայրապետի ազգիս, «Արարատ», Վարդշապատ, 1890, N Ե, էջ 284-285:

2 «Մշակ», Թիֆլիս, 1890, ապրիլի 17, N 42:

3 Նույն տեղում:

4 Տե՛ս KK на 1889 г., Тифлис, 1888, с. 148, տե՛ս նաև KK на 1895 г., Тифлис, 1894, с. 140.

5 «Մշակ», Թիֆլիս, 1890, ապրիլի 17, N 42:

այն գովելի նպատակը, որի համար տրվում էր ներկայացումը՝ ուսումնարանի հիմնարկութիւնը»¹: Դպրոցի հոգաբարձուներն էին Խորեն քին. Մելիք-Դադայանը (նախագահ), երեսփոխան Բաղդասար Մարգարյանը, Հայրապետ Բաղդայանը և Հովհաննես Մկրտչյանը (գանձապահ): Անձնափոխանորդներն էին Խաչատուր Շափաղաթյանը և Մանուչար Սափյանը²: Դպրոցի առաջին ավագ ուսուցչի պաշտոնը 1890-1893 թթ. վարել է ճեմարանավարտ Ռաֆայել Տեր-Ավագյանը (Աբրահամյան)³: Դպրոցում դասավանդվել է կրոն, հայոց լեզու, թվաբանություն, հայրենագիտություն, հայոց պատմություն, ընդհանուր աշխարհագրություն, բնական գիտություն, նկարչություն, վայելչագրություն և երգեցողություն⁴: Հայոց և ռուսաց լեզուների առաջին ուսուցիչն էր Խ. Փիրջանյանը⁵: Հոգաբարձական խորհրդի որոշմամբ՝ հայոց լեզվի ուսուցիչ է հրավիրվում նաև ճեմարանավարտ Գ. Տեր-Հովհաննիսյանը⁶:

Եկեղեցական-ծխական դպրոցի հանդիսավոր բացումը բազմաթիվ ներկաների, գավառապետի ու հաշտարար դատավորի մասնակցությամբ տեղի ունեցավ 1890 թ. սեպտեմբերի 17-ին: Զահանաների օրհնանքից և ծխական քահանա Խորեն Մելիք-Դադայանի ելույթից հետո թարգմանի միջոցով ողջույնի խոսք է ասում նաև գավառապետը՝ Նշելով. «...վաղուց է ես լսել եմ, որ գործեցիները մտադիր են ուսումնարան բանալու և այսօր բաղդ եմ ունենում տեսնել մի այդպիսի յառաջադիմութիւն...»⁷:

Տարբեր տարիներին դպրոցում արգասավոր մանկավարժական գործունեություն են ծավալել ժամանակի ճանաչված մանկավարժներ Գրիգոր Տեր-Հովհաննիսյանը (ավարտել է Գևորգյան ճեմարանը), Աբրահամ Բաբայանը, Հասմիկ Մալխասյանը, Սամսոն Դավթյանը (ավարտել է Գևորգյան ճեմարանը), Աբրահամ Բարսեղյանը, Համբարձում Տեր-Ղազարյանը (ավարտել է Ալեքսանդրապոլի արական գիմնազիան), Կատարինե Սարոյանը (ավարտել է Ալեքսանդրապոլի Արղության օրիորդաց դպրոցը), Հովհաննես Գրիգորյանը, շուշեցի Առաքել քին. Յուզբաշյանը⁸ և ուրիշներ⁹:

1 Նույն տեղում:

2 Գորիսի երկրագիտական թանգարան: Մ. Մ., N 3216, տե՛ս նաև Կորիսից (Չանգեագուրի գաւառ), «Նոր-Դար», Թիֆլիս, 1891, յունիսի 15, N 100:

3 Տե՛ս ՀԱԱ, ֆ. 7, ց. 1, գ. 89, թ. 10, տե՛ս նաև գ. 90, թ. 11, տե՛ս նաև «Արձագանք», Թիֆլիս, 1893, յուլիսի 21, N 83: Ռաֆայել Տեր-Ավագյանը (Աբրահամյան: 1867-^o թթ.) ծագումով պարսկահայ է: Նախապապը, որ ծնվել է Պարսկահայքի Սալմաստ գավառի Սավրա գյուղում, 1828 թ. ներգաղթել է Վայոց Ձոր՝ Դարալագյազ և հաստատվել Բաշքենո գյուղում: Այստեղ է ծնվել Ռաֆայելի հայրը՝ Ավագ քին. Աբրահամյանը, ով քահանայագործել է Բաշքենո, Մալիշկա, այնուհետև՝ Վայոց Ձորի հոգևոր կենտրոն Արկյազի Սուրբ Խաչ վանքում: Ավագ քին. Աբրահամյանն ունեցել է չորս որդի (Գրիգոր, Գաբրիել, Միքայել, Ռաֆայել), որոնք աչքի ընկնող դեր են կատարել Վայոց Ձորի կրթալուսավորական բնագավառում: Ռաֆայելը նախ ուսուցչություն է արել Գորիսում, ապա՝ Բաքվում և Հյուսիսային Կովկասի հայաշատ քաղաքներում: Եղել է 1921 թ. Փետրվարյան ապստամբությունից հետո «Հայրենիքի փրկության կոմիտեի» կողմից Վայոց Ձոր գործուղված հատուկ հանձնաժողովի անդամ (տե՛ս Ռուբեն Աբրահամյան: Խմբագիր եւ կազմող՝ **Սիմոնեան Ա.**, Երևան, 2013, էջ 14, 18):

4 Տե՛ս ՀԱԱ, ֆ. 48, ց. 1, գ. 451, թ. 23:

5 Տե՛ս **Յով. Դան. [Հովհաննես Դանիեյան]**, Նամակ Գորիսից, «Մշակ», Թիֆլիս, 1890, սեպտեմբերի 27, N 110, տե՛ս նաև «Նոր-Դար», Թիֆլիս, 1891, յունիսի 15, N 100:

6 Տե՛ս *** **[Գրիգոր Գրիգորյան]**, Նամակ Գորիսից, «Մշակ», 1890, օգոստոսի 4, N 87):

7 **Յով. Դան. [Հովհաննես Դանիեյան]**, Նամակ Գորիսից, «Մշակ», Թիֆլիս, 1890, սեպտեմբերի 27, N 110:

8 Առաքելը նախքան այդ 1840-1860-ական թթ. եղել է Արցախի կոնսիստորիայի անդամ, հետագայում քահանայագործել է Շուշիի Ղազանչեցոց Սբ. Ամենափրկիչ եկեղեցում (տե՛ս ՀԱԱ, ֆ. 56, ց. 1, գ. 4221, ց. 4, գ. 492, թ. 20, տե՛ս նաև **Յուզբաշյան Հ.**, Ես ապրել եմ Շուշիում, Երևան, 2017, էջ 10):

9 Տե՛ս ՀԱԱ, ֆ. 7, ց. 1, գ. 89, թ. 10-ի շրջերես, տե՛ս նաև ֆ. 7, ց. 1, գ. 90, թ. 11, տե՛ս նաև ֆ. 7, ց. 1, գ. 142, թ. 21:

Հարուստ և հետաքրքիր պատմություն ունի Սբ Հռիփսիմե ծխական դպրոցը: Հիմնադրումից ի վեր՝ դպրոցը նվիրվել է բացառապես ազգագուստ գործունեության՝ կրթելով ու դաստիարակելով բազմաթիվ երեխաների: Սակայն արևելահայ մյուս դպրոցների պես, այս դպրոցը ևս, խոչընդոտներով լեցուն ուղի է անցել: Դա պայմանավորված էր ոչ միայն դպրոցը նյութական անհրաժեշտ միջոցներով և ուսուցչական մշտական խմբերով ապահովելու խնդրով, այլև ինքնակալության կողմից դեռևս XIX դարի երկրորդ կեսից սկսված ուժացման քաղաքականության հարուցած դժվարությունները հաղթահարելով: Ցարական իշխանությունները, հենց սկզբից արտոնյալ պայմաններ ստեղծելով արքունի դպրոցների համար, պայքարեցին հայ եկեղեցու դեմ՝ աշխարհականների գավակներին արգելելով հաճախել հոգևոր-ազգային դպրոցներ¹:

Դպրոցը չունեւ սեփական շէնք, ինչի պատճառով դասերն անցկացվել են վարձու մասնավոր շինությունում: 1890-1891 թթ. ուսումնական տարում դպրոցն ուներ 60 աշակերտ²: Երկու տարի անց՝ 1892-1893 թթ. ուսումնական տարվանից, նոր միայն հաճախել են փոքրաթիվ աշակերտուհիներ³: Նկատենք, որ ինչպես Հայաստանի այլ վայրերում, Չանգեզուրի գավառում ևս դեռևս շատ ուժեղ էին նախապաշարումները, ուստի աղջիկների կրթության գործում ձեռք բերվածը լուրջ առաջընթաց էր:

Ուսումնական տարին ավարտվում էր ծխականների ներկայությամբ տրվող հաշվետվությամբ: Առաջին հաշվետվությունը ներկայացրել է Խ. Փիրջանյանցը, որն առաջադեմ աշակերտներին բաժանել է գրքույկներ: Նա, իր ելույթում մատնանշելով դպրոցի առջև ծառայած խնդիրները, «...խրախուսեց ժողովրդին հոգալ եկող տարուայ երկրորդ դասատուն բացելու պատճառով վարձել մի ընդարձակ շինութիւն, որ համապատասխան լինի մանկավարժական պահանջներին»⁴:

Հիշարժան են հատկապես դպրոցի աշակերտության ուժերով կազմակերպած տարեվերջյան տոնական հանդեսները, որոնց սովորաբար ներկա էին լինում սովորողների ծնողները և հոգաբարձուները: Ինչպես, օրինակ, 1893 թ. հուլիսի վերջին՝ Ռաֆայել Տեր-Ավագյանի տարեկան հաշվետվությունից հետո, «...աշակերտներից կազմած երգեցիկ խումբը երգեց քանի մի ազգային երգեր և մեջ ընդ մեջ էլ աշակերտները անգիր կարդացին զանազան ոտանաւորներ Գամառ-Քաթիպայից, որոնք խորը ազդեցին ժողովրդի վրայ»⁵: Վերջում, հանդեսին ներկա ուսանող Տ. Բեկզադյանի⁶ առաջարկությամբ՝ դպրոցի օգտին հանգանակվում է 50 ռ. և հանձնվում հոգաբարձությանը⁷:

1 Տե՛ս **Երկանյան Վ.**, Հայկական դպրոցը 1800-1870 թթ., ԼՀԳ, Երևան, 1970, N 10, էջ 34:

2 Տե՛ս Կորիսից (Չանգեզուրի գաւառ), «Նոր-Դար», Թիֆլիս, 1891, յունիսի 15, N 100:

3 Տե՛ս ՀԱԱ, ֆ. 7, ց. 1, գ. 142, թ. 31:

4 Կորիսից (Չանգեզուրի գաւառ), «Նոր-Դար», Թիֆլիս, 1891, յունիսի 15, N 100:

5 «Արձագանք», Թիֆլիս, 1893, յուլիսի 21, N 83:

6 Ձեռքի տակ չունենալով ստույգ տեղեկություններ, այդուհանդերձ, կարծում ենք, որ խոսքն այստեղ հետագայում ճանաչված հասարակական-պետական գործիչ Տիգրան Հարությունի Բեկզադյանի (1871թ. Շուշի-08.08.-1942 թ. Փարիզ) մասին է: Հարություն Բեկզադյանը Շուշիից Բաքու էր տեղափոխվել 1901 թ.: Բեկզադյանները եղել են յոթ եղբայրներ՝ անդամագրված տարբեր կուսակցությունների: Նրանցից Ալեքսանդրը բուլճարի էր, Տիգրանը հարում էր ՀՅԴ-ին, Հովսեփը և Պետրոսը սոցիալիստ-հեղափոխականներ էին, Դուբենը՝ միապետական: Քաղաքական գործունեությամբ չեն զբաղվել Արամն ու Գուրգենը (տե՛ս **Սիմոնյան Հ.**, Ազատագրական պայքարի ուղիներում, գիրք Ա, Երևան, 2003, էջ 82-83):

7 Տե՛ս «Արձագանք», Թիֆլիս, 1893, յուլիսի 21, N 83:

Ավագ ուսուցչի պաշտոնում Ռաֆայել Տեր-Ավագյանին փոխարինել է դպրոցական գործի հմուտ կազմակերպիչ, ճեմարանավարտ Գեղեոն Տեր-Մինասյանը (1893-1897 թթ.)¹:

1894 թ. դեկտեմբերի 3-ին դպրոցի դահլիճում կազմակերպվում է սբ. Թադևոս և սբ Բարդուղիմեոս առաքյալների հիշատակին նվիրված հանդես: Ծնողներից բացի՝ միջոցառմանը ներկա էին գյուղաքաղաքի երևելիները. «Հանդիսականների մեջ նկատելի էր հայ կանանց և օրհորդների ներկայութիւնը: Մինչև անգամ նկատելի էր տեղական տարագրվ մի կին: Դա ուրախալի երևոյթ է, որովհետև դեռ երեկ հայ կինը, հայ օրհորդը ամօթ էր համարում երևան գալ այդպիսի հանդեսներում, իսկ այսօր միանգամայն ոտքի տակ տալով նախապաշարմունքը, նա վստահաբար իր ամուսնու հետ միասին գնում է դպրոցական հանդեսներին ներկայ լինելու»²: Միջոցառմանը հոգևոր երգերի կատարումներով հանդես եկավ դպրոցի աշակերտներից և աշակերտուհիներից բաղկացած երգեցիկ խումբը: Եղան նաև անհատ կատարումներ: Ներկաների վրա հատկապես մեծ ներգործություն ունեցավ մի աշակերտուհու կատարմամբ հնչած «Գիշերը Վանում» երգը, որն «...այնքան դուրեկան էր, որ նոյն իսկ Գօրիսի խօջաններից մի քանիսի քարացած զգացմունքների վրա էլ ազդեց»³:

Նշենք, որ դպրոցի արդյունավետ գործունեությանը զուգընթաց՝ 1895 թ. օգոստոսի դրությամբ դեռևս չէր լուծվել սեփական շինություն ունենալու հարցը: Գորիսից «Մշակին» հղած թղթակցությունում Հովհաննես Դանիելյանն այդ առիթով գրում է. «Նոր Գօրիսը սեփական եկեղեցի և դպրոցի շէնք չունի. յոյս ունենք, որ կաթողիկոսը (Խրիմյան Հայրիկը - Գ. Ս.) Գօրիսը այցելելով՝ ոչինչ կարգադրութիւն չի ինայի այդ երկու հիմնարկութիւնների գործը աջողեցնելու համար»⁴: Դպրոցն իր բեղմնավոր գործունեությունը շարունակեց մինչև 1896 թ. կեսերը և փակվեց հայկական դպրոցների դեմ ցարական իշխանությունների վերսկսած հալածական քաղաքականության հետևանքով⁵:

1 Տե՛ս ՀԱԱ, ֆ. 7, ց. 1, գ. 89, թ. 10, տե՛ս նաև գ. 90, թ. 11, տե՛ս նաև «Արծազանք», Թիֆլիս, 1893, յուլիսի 21, N 83, տե՛ս նաև գ. 142, թ. 21, տե՛ս նաև ֆ. 312, ց. 2, գ. 1263, թ. 19-20: Գեղեոն Տեր-Մինասյանը ծնվել է Կապանի խլաթաղ գյուղում՝ քահանայի ընտանիքում: 1880 թ. ավարտել է Էջմիածնի Գևորգյան հոգևոր ճեմարանի 2 դասարանը: Ուսուցչություն է արել Լախ Շուշիի թեմական, Մարիամյան, Նուխիի երկսեռ ծխական դպրոցներում (եղել է Նուխիի «Կովկասի Հայոց բարեգործական ընկերության» մասնաճյուղի վարչության անդամ, տե՛ս «Նոր-Դար», Թիֆլիս, 1893, դեկտեմբերի 10, N 220), 1893-1897, ապա 1905-1906 թթ. եղել է Գօրիսի Սբ Հռիփսիմե ծխական դպրոցի ավագ ուսուցիչը: Այդտեղից մասկավարժական գործունեությունը շարունակել է Շրվենանց գյուղում՝ որպես ավագ ուսուցիչ (տե՛ս **Տեր-Մինասեան Գ.**, Համառոտ տեղեկագիր Շրվենանց գիւղի հայոց եկ.-ծխ. երկդասեան-երկսեռ «Գ. Յ. Տեր-Մարգարեան» դպրոցի 1914/1915 ուս. տ., «Փայլակ», Շուշի, 1915, յուլիսի 23, N 39): Անդամակցել է ՀՅԴ կուսակցությանը: 1918-1921 թթ. Չանգեզուրի համար ստեղծված ռազմաքաղաքական ծանր կացության ժամանակ զբաղվել է հասարակական-քաղաքական ակտիվ գործունեությամբ: Չինակցել է Անդրանիկին, Արսեն Շահմազյանին, այնուհետև՝ Գարեգին Նժդեհին: Չգալի ավանդ ունի թուրք-մուսավաթական հարձակումներից երկրամասի պաշտպանության գործում: Եղել է Ինքնավար Սյունիքի Սահմանադիր Ժողովի նախագահ, Լեռնահայաստանի կառավարությունում զբաղեցրել է պետական վերահսկիչի պաշտոնը: 1921 թ. տարագրվել է Իրան: 1937 թ. վերադարձել է Հայաստան: Նույն թվականի նոյեմբերին ձերբակալվել է, իսկ դեկտեմբերի 17-ին՝ զնդակահարվել (տե՛ս ՀԱԱ, ֆ. 7, ց. 1, գ. 142, թ. 21, տե՛ս նաև **Սմբատյան Գ.**, Երկաթե վարագույրից այս կողմ, Երևան, 2009, էջ 145):

2 **Գ. Դ. [Հովհաննես Դանիելյան]**, Նամակ Գօրիսից, «Մշակ», Թիֆլիս, 1894, դեկտեմբերի 15, N 145:

3 Նույն տեղում:

4 **Գ. Դ. [Հովհաննես Դանիելյան]**, Նամակ Գօրիսից, «Մշակ», Թիֆլիս, 1895, օգոստոսի 29, N 98:

5 Տե՛ս ՀԱԱ, ֆ. 7, ց. 1, գ. 153, թ. 5, տե՛ս նաև **Խուրդյան Ա.**, Նշվ. աշխ., էջ 119:

Դպրոցը վերաբացվել է միայն 1905 թ. օգոստոսի 1-ին որպես միդասյան արական դպրոց: Սակայն դպրոցը չունեի սեփական շինություն: Վերաբացված դպրոցի պարապմունքները տակավին անցկացվում էին Գորիսի բազմարդյուն ու անվանի մարդկանցից մեկի՝ 1907 թ.-ից դպրոցի հոգաբարձների խորհրդի անդամ¹ Առաքել Տեր-Մովսիսյանի² ժամանակավորապես տրամադրած «Պողոտայի» փողոցի³ վրա գտնվող երկհարկ սեփական տան հինգ սենյակները⁴: Դպրոցում 1905-1908 թթ. ուսանած Վաղարշակ Հովակիմյանը 1961 թ. սեպտեմբերի 26-ին գրառած «Հուշեր Ակսել Բակունցից» վերտառությամբ հուշ-ակնարկում, որ վառ հիշողություններ է թողել գրողի մասին, այդ մասին վկայում է. «1905 թ. օգոստոսն էր, անտառից փայտը շալակիս դեռ նոր էի վերադարձել տուն, երբ հորեղբորս որդիներից մեկը հեփհեփ ներս ընկավ մեր բակը և ինձ ասաց. «Շուն՛տ արա, վագիր քաղաք, դափանցի Առաքելի տանը բացվել է հայոց ըշկու, բուրին էլ ընդունում են...»: Այդ ատեն ես 11 տարեկան էի: Չանցած 5-10 րոպե, ես արդեն կանգնած էի հայոց դպրոցի երկհարկանի քարակոփ շենքի գավթում հավաքված երկսեռ բազմության մեջ: Նրանք բոլորն էլ ուրախ էին և գվարթ: Նրանցից յուրաքանչյուրը բռնած իրենց երեխաների ձեռքերից՝ սրտատրոփ հերթի էին սպասում. որոշվում էր իրենց զավակների բախտը: Գավթում հավաքված բազմության մեջ, ի շարս այլոց, իմ տեսադաշտից չվրիպեց նաև տարիքով ամենից փոքր Թևոսյան Ալեքսանդրը (Ակսել Բակունցը - Գ. Ս.), որ ճտիկի պես բռնել էր իր հոր՝ Ստեփան ամու չուխայի փեշից և ուրիշների պես հերթի էր սպասում ցուցակագրվելու Գեդեոն վարժապետի (դպրոցի ավագ ուսուցիչ Գեդեոն Տեր-Մինասյանի - Գ. Ս.) մատյանում»⁵:

Չանգեզուրի գավառի ծխական դպրոցներում, այդ թվում նաև Գորիսի դպրոցում, կյուրական խնդիրներից զատ, առկա էին նաև ուսումնակրթական լուրջ բացթողումներ: Գորիսի դպրոցի ուսուցիչ, գավառահայության լուսավորության շարժման գործունյա մասնակից Տ. Սազանդարյանը, Թիֆլիսում լույս տեսնող «Արօր» թերթի 1907 թ-ի № 8-ում հրատարակած «Դպրոցները Չանգեզուրում» վերտառությամբ հոդվածում բարձրաձայնելով դպրոցի անմխիթար վիճակի մասին, գրում է. «Չանգեզուրում կան 75 հայ գիւղեր, բայց դպրոց՝ այն էլ եթե իր մի շարք անյարմարութիւնները, հազար ու մի պակասութիւնները մոռանալու լինենք, Գորիսը միայն ունի: Եւ ի՞նչ դպրոց է դա: Կատարեալ բարե-

1 Տե՛ս ՀԱԱ, ֆ. 7, ց. 1, գ. 155, թ. 17, տե՛ս նաև ֆ. 56, ց. 15, գ. 544, թ. 11:

2 Առաքել Տեր-Մովսիսյանը զբաղվել է առևտրով և Գորիսում ունեցել է խանութ (տե՛ս Գեորգիսի, «Նոր-Դար», Թիֆլիս, 1889, սեպտեմբերի 26, N 158):

3 Տե՛ս Ա. **Չանգեզուրցի [Արտեմ Խանզադյան]**, Դաշնակցութեան մուտքն ու աշխատանքը Չանգեզուրում (Կազմակերպիչ ընկերները ինչպիսի վախճանի արժանացան), «Ալիք», Թեհրան, 1979, յունիսի 3, N 113, էջ 6:

4 Տե՛ս Ակսել Բակունցը ժամանակակիցների հուշերում, էջ 9-10, տե՛ս նաև ՀԱԱ, ֆ. 7, ց. 1, գ. 156, թ. 31-շրջերես: Ա. Բակունցի կյանքն ու գործունեությունն ուսումնասիրելու նպատակով 1959-1960 թթ. Գորիս այցելած բ.գ.դ, պրոֆ. Ռաֆայել Իշխանյանը գրում է, որ Առաքել Տեր-Մովսիսյանի տունը գտնվում էր Շահումյան փողոցի թիվ N 17 հասցեում և այն բնակելի էր (տե՛ս **Իշխանյան Ռ.**, Ակսել Բակունցի կյանքն ու արվեստը, Երևան, 1974, էջ 13): Կոփածո քարերով շենքի ներկայիս հասցեն է՝ Կոմիտասի փ. N 15: 2017 թ. մայիսի 2-ին՝ Գորիս հերթական այցելության ժամանակ, Առաքել Տեր-Մովսիսյանի քրոջ՝ Սանամի թոռ Գագիկ Գրիգորյանը մեզ տեղեկացրեց, որ շենքի սկզբնամասի հատվածը, որտեղ եղել է գեղեցիկ պատշգամբ, քանդվել է 1950-ական թվականների կեսերին, իսկ տեղում կառուցվել է եռահարկ բազմաբնակարան շինություն:

5 Ակսել Բակունցը ժամանակակիցների հուշերում: Կազմողներ՝ **Ն. Հովսեփյան, Զ. Թունյան, Զ. Միքայելյան**, Երևան, 1999, էջ 9-10:

լոնեան խառնակ դրուբիւնից վերցրած մի տեսարան է նա ներկայացնում, իր գանազան «մասսաքի» ծառայող հոգաբարձուներով, որոնք դպրոցից այնքան հեռու են, որքան Ա-Ֆ-ից: Այդ դեռ գաւառական քաղաքի դպրոցն է. ապա անցէք գիւղերը, որպիսի ամայութիւն կը բացւի ձեր դիմաց...»¹: Հոդվածագիրը դպրոցի անմխիթար վիճակի համար առաջին հերթին ամբաստանում էր քաղաքի հարուստ և ունևոր դասակարգին, որն «...իրենց որդոց ուղարկում են քաղաքներ, իսկ գաւառում մանուկների կրթութեան սկզբնական ուսման ընդհանրացման մասին չեն հոգում»²:

Դպրոցի գործունեությունը որոշակի կանոնակարգված հիմքերի վրա դրվեց, երբ ավագ ուսուցչի պաշտոնը ստանձնեց ծնունդով գորիսեցի, XX դարասկզբի բազմաշնորհ ու լուսամիտ գործիչներից մանկավարժ, հրատարակիչ-խմբագիր և հրապարակախոս Սիմեոն Տեր-Մինասյանը, որը, 1907 թ. «յոյժ գովելի վարքով» ավարտելով Գևորգյան հոգևոր ճեմարանի դպրոցական բաժինը, հայոց լեզվի և գրականության ուսուցիչ էր աշխատում նախ՝ Վաղարշապատի, ապա՝ 1908 թ. սեպտեմբերից Վերին Ղամարլուի (այժմ Արտաշատ) ծխական դպրոցներում³: Ս. Տեր-Մինասյանը, հավատարիմ իր պարտքին, ընդունում է Գորիսի Սբ. Հռիփսիմե ծխական դպրոցի հոգաբարձական խորհրդի հրավերն ու թեմական խորհրդի որոշումը և գրական ու կրթական ծրագրերի ապագա հղացումների պաշարով ավագ ուսուցչի պաշտոնով 1909 թ. ամռան սկզբներին տեղափոխվում ծննդավայր, այդ պաշտոնով փոխարինելով Ներսես Տեր-Գրիգորյանին⁴:

Ս. Տեր-Մինասյանը ավագ ուսուցչի պատասխանատու պաշտոն ստանձնեց այն ժամանակ, երբ գավառակենտրոն Գորիսում հասարակական կյանքը առաջ էր ընթանում դանդաղ քայլերով: Տիրում էր հեղձուկ միջավայր, սոցիալական անարդարությունների պատճառով ժողովուրդն ապրում էր ծանր կենսապայմաններում: Անմխիթար վիճակում էր գտնվում հատկապես դպրոցական գործը: «Լևոն Սյունեցի» ստորագրությամբ հեղինակը ահագանգում էր. «...ցառք սրտի պէտք է արձանագրեմ, որ մեր քաղաքի գեղեցկութեան մեջ ցցւած է մեր կրթական հաստատութիւնների անմխիթար պատկերը, շնորհիւ հասարակութեան որոշ խաւերի անտարբերութեան: Այժմ քաղաքում գոյութիւն ունի երկու դպրոց՝ մեկը՝ պետական՝ մի զուգընթաց բաժանմունքով, ուր սովորում են մօտ 180 աշակերտներ, միւսը՝ ծխական երկդասեան, որտեղ սովորում են մօտ 200 աշակերտ-աշակերտուհիներ: Ուս. տարւայ սկզբին այս վերջինի գլխին՝ դամուկլեան սրի պես կախւել էր փակման վտանգը»⁵: Նյութական միջոցների բացակայության պատճառով Սբ. Հռիփսիմեի եկեղեցական-ծխական հնգամյա դպրոցը 1909 թ. օգոստոսից կարճ ժամանակով դադարեցրել էր գործունեությունը: Բացի այդ՝ նյութական բավարար միջոցների բացակայության պատճառով վտանգվել էր դպրոցի 1909-1910 թթ. ուսումնական տար-

1 **Սագանդարեան [Տ.]**, Դպրոցները Չանգեզուրում, «Արօր», Թիֆլիս, 1907, սեպտեմբերի 12, N 8:

2 Նույն տեղում:

3 Տե՛ս **ԲԷԿ**, Սիմեոն Տեր-Մինասեան, «Ղարաբաղ», Շուշի, 1912, յունիսի 28, N 46, տե՛ս նաև **Տեր-Մինասեան Ս.**, Բաց նամակ Վաղարշապատի հասարակութեանը, «Գործ», Թիֆլիս, 1908, հոկտեմբերի 17, N 31, տե՛ս նաև **Տեր-Յարութիւնեանց Յով.**, Կենդրոնական դպրոցի խնդիրը: Ղամարլու, 13 օգոստոսի, «Հորիզոն», Թիֆլիս, 1909, օգոստոսի 23, N 18:

4 Տե՛ս «Գործ», Թիֆլիս, 1908, հոկտեմբերի 31, N 43:

5 **Սիւնեցի Լևոն [Լևոն Միջայեյան]**, Գորիս, «Հորիզոն», Թիֆլիս, 1910, փետրւարի 19, N 39:

վա գործունեությունը¹: Պատճառը՝ ուսուցիչների մեծ մասի նախորդ տարվա-
նից չվճարված աշխատավարձերն էին, երբ վերջիններս այդ հարցով ընդհուպ
դիմել էին դատարան, իսկ ոմանք՝ հեռացել Գորիսից²: Դպրոցի փակմանն էր
նպաստել նաև քաղաքում տարածված քուլթեշ հիվանդությունը, որի պատ-
ճառով «...հոգաբարձուքիւնը, ծխականների որոշմամբ, արձակել է սաներին
մինչև հիւանդութեան դադարումը»³: Գորիսից Լևոն Սյունեցին «Գործ» օրա-
թերթին հղած թղթակցությունում վկայում էր. «Երկու ամսից անել է ինչ քուլթեշ
հիւանդութիւնը տարածւած է Գորիսում: Փոխանակ օր ըստ օրէ առաջն առնե-
լու միջոցներ ձեռք առնելու, մեզ մօտ այդ հիւանդութիւնը քանի գնում, այնքան
ծաւալում է»⁴:

Գիտակցելով իր ձեռնարկած գործի կարևորությունը հարազատ քաղաքի,
ինչպես նաև գավառի ու նրա բնակչության համար՝ Ս. Տեր-Մինասյանը հա-
սարակական եռանդուն գործունեություն սկսեց գաղափարակից մտավորա-
կաններին գործի ասպարեզ ներքաշելու հետևյալ կոչով. «**Ընկերներ՛ր, ծանր են
պայմանները, քնած է ժողովուրդը, մեզ ոչ ոք չի հասկանում: Աշխատենք միա-
սին, անենք կարելին և այսպիսով ազատ ու հանգիստ լինենք մեր բարոյակա-
նի ու խղճի առաջ**»⁵:

Փորձառու Ս. Տեր-Մինասյանի մանկավարժական կարողությունները լայ-
նորեն դրսևորվում են առաջին իսկ տարում: Նրա պաշտոնավարման շրջանը
համընկնում է դպրոցական գործի աշխուժացման ու վերելքի ժամանակներին:
Ծանոթանալով դպրոցի ընդհանուր վիճակին՝ Ս. Տեր-Մինասյանը եռանդալից
մղվեց դպրոցի գործունեության վերսկսման, կրթական գործի բարելավման ու
զարգացման գործին: Նրա տևական անդուլ ջանքերի շնորհիվ 1909 թ. սեպ-
տեմբերին վերսկսվում է ծխական դպրոցի գործունեությունը: Դրանում նրան
մեծապես աջակցեցին դեռևս 1907 թ. հոգաբարձուներ ընտրված Սերգեյ Տեր-
Մինասյանը (նախագահ), Գալուստ Յոյանը, Պետրոս Տեր-Հարությունյանը և
Առաքել Տեր-Մովսիսյանը⁶: Վերաբացվելուց հետո դպրոցի բյուջեն կազմում էր
2790 ռ⁷: Ուսման տարեկան վարձը կազմում էր 1 ռ.⁸: 1909 թ. սեպտեմբերից
դպրոցում դասավանդում էին Ս. Տեր-Մինասյանը, Տ. Սազանդարյանը, Լիզա
Տիգրանյանը (ավարտել է Թիֆլիսի օրիորդաց գիմնազիայի VII դասարանը)
և Արմենակ Ղարազյոզյանը (ավարտել է Շուշիի ռեալական ուսումնարանը)⁹:
Կարճ ժամանակ անց՝ դպրոցն արդեն աչքի էր ընկնում իր կարգապահությամբ
և կազմակերպվածությամբ:

1 Տե՛ս Վ. Հ. [Սիմեոն Տեր-Մինասյան], Մեր իրականութիւնից (I), «Հորիզոն», Թիֆլիս, 1909, օգոստոսի 28, N 22:

2 Տե՛ս Lorentio D., Գորիս, մայիսի 27, «Գործ», Թիֆլիս, 1909, յունիսի 9, N 120, տե՛ս նաև Վ. Հ. [Սիմեոն Տեր-Մինասյան], Մեր իրականութիւնից (I), «Հորիզոն», Թիֆլիս, 1909, օգոստոսի 28, N 22:

3 Ե., Գորիս, 13 ապրիլի, «Գործ», Թիֆլիս, 1909, ապրիլի 21, N 81:

4 Սիւնեցի Լևոն [Լևոն Միքայելյան], Գորիս, 26 մայիսի, «Գործ», Թիֆլիս, 1909, յունիսի 11, N 122:

5 «Գաւառի ձայն», Ալեքսանդրապօլ, 1914, ապրիլի 24, N 37:

6 Տե՛ս ՀԱԱ, ֆ. 7, ց. 1, գ. 155, թ. 17, տե՛ս նաև ֆ. 56, ց. 15, գ. 544, թ. 11:

7 Տե՛ս ՀԱԱ, ֆ. 7, ց. 1, գ. 155, թ. 17:

8 Տե՛ս Ա. Զանգեզուրցի [Արտեմ Խանգաղյան], Դաշնակցութեան մուտքն ու աշխատանքը
Զանգեզուրում (Կազմակերպիչ ընկերները ինչպիսի վախճանի արժանացան), «Ալիք», Թեհրան,
1979, մայիսի 23, N 105, էջ 5:

9 Տե՛ս նույն տեղում:

Մանկավարժական նոր հայացքներով տոգորված Ս. Տեր-Մինասյանը որակական մի շարք փոփոխություններ կատարեց ուսումնական-կրթական կյանքում: Նա հետամուտ էր ստեղծել կրթական մի համակարգ, որի հիմքում կդրվեին հոգևոր ու ազգային ուսուցման ուղղությունները: Նա հնարավորինս փորձեց կանոնավորել դպրոցական գործը, լուծել առանցքային խնդիրներ. շենքային պայմանների ապահովում, ուսուցիչների մշտական խմբերի պահպանում, աշխատավարձերի ժամանակին տրամադրում, նյութական դրուժայան բարելավում, դպրոցի տարեկան նախահաշիվների կարգավորում և ճիշտ ֆինանսավորում, մանկավարժական խորհրդի դերի բարձրացում, դպրոցում կարգ ու կանոնի պահպանում, աշակերտների մտավոր ու ֆիզիկական դաստիարակության զուգակցում, աշակերտների համար անհրաժեշտ գրենական պիտույքների ձեռքբերում և այլն¹:

Հիշարժան է, որ 1905-1910 թթ. ծխական դպրոցում իր նախակրթությունն է ստացել XX դ. հայ արձակի մեծանուն դեմքերից մեկը՝ Ալեքսանդր Ստեփանի Թևոսյան-Բակունցը²: Նրա ավարտական վկայականից տեղեկացվում է, որ դպրոցում ուսուցանվել են հետևյալ առարկաները՝ կրոն, հայոց լեզու, ռուսաց լեզու, թվաբանություն, բնագիտության պատմություն, հայոց պատմություն, ռուսաց պատմություն, ընդհանուր աշխարհագրություն, ռուսաց աշխարհագրություն, երգեցողություն, երկրաչափություն-ձևագիտություն, գծագրություն-նկարչություն, գեղագրություն և ձեռագործ³:

Դպրոցական օրերի տպավորություններն Ա. Բակունցը հետագայում գեղարվեստական պատկերներով նկարագրել է «Բրուտի տղան» գեղեցիկ պատմվածքում:

«Դասարանում... Ծիրանի ծառը ստվեր է գցել տետրակիս վրա: Արևի շողը փայլվում է մատիտի ծայրին և արտացոլում եղունգիս վրա: Մեկը բոթում է թևս.

- Մեծատառ Ծ-ն ո՞նց է:
- Է՛...
- Մի շվի կտամ:
- Այ, տե՛ս,- և ցույց եմ տալիս:
- Վերջին նստարան, լռությո՛ւն,- սաստում է ամբիոնին կռթնած ուսուցիչը: Ճռռում են կոշիկները: Մենք թեպետ վայելչագրության տետրակի վրա գլխահակ ենք, բայց գիտենք, որ նա դեպի մեզ է գալիս: ...
- Վազի՛ր, զանգը տուր,- և օրապահը թնոնում է տեղից:

Սկսվում է ամենից զվարթ և աղմկալի երկու բոպեն, մինչև զանգը հնչի և վազենք բակը: Բոթում ենք իրար, կսմթում, մի խոսքով, ելք է ստանում հոգևորությունից և ակամա լռությունից զսպված մեր մանկության զվարթությունը»⁴:

Նկատենք, որ նյութական միջոցների սղության պատճառով ծխական դպրոցի աշակերտներն իրենց հագուստներով խիստ տարբերվել են պետա-

¹ Տե՛ս **Տեր-Մինասեան Ա.**, Ուսուցչի խոհերից, «Նոր դպրոց», Թիֆլիս, 1910, հոկտեմբեր, N10, էջ 56-64:

² Ակսել Բակունցի տուն-թանգարան, գիտաօժանդակ ֆոնդ, փաստաթուղթ N 402, տե՛ս նաև ՀԱԱ, ֆ. 312, ց. 2, գ. 246, թ. 4:

³ Տե՛ս ՀԱԱ, ֆ. 312, ց. 2, գ. 246, թ. 4, տե՛ս նաև Ակսել Բակունցի տուն-թանգարան, գիտաօժանդակ ֆոնդ, փաստաթուղթ N 402:

⁴ **Բակունց Ա.**, Բրուտի տղան, Ընտրանի, Երևան, 2009, էջ 154:

կան դպրոցում սովորողներին: Ի տարբերություն այդ դպրոցի՝ հայկական դպրոցի աշակերտները չեն ունեցել դպրոցական առանձին հագուստ: «Հայոց դպրոցի երեխաները,- գրում է Ա. Բակունցը,- տրեխներով էին, տարվա մեծ մասը՝ գլխաբաց: Դպրոցից հետո նրանք աշխատում էին տանը և բանջարանոցում, օգնում էին ծնողներին՝ արհեստանոցներում, և պատահում էր, որ դպրոցից վերադառնալով, ներկարար Նեսու տղան հագնում էր հոր մեծ կոշիկները և ներկի դուլլերը ձեռքին հոր հետ գնում էր աշխատանքի»¹:

Նշենք, որ տվյալ ժամանակաշրջանում ինչպես արևելահայ մյուս ծխական դպրոցները, Գորիսի դպրոցը ևս, աչքի է ընկել դաստիարակության իր խստաբարո օրենքներով. տիրապետող էր տերթոդիկյան դաժան մեթոդը, իշխում էր ծեծը, ֆալախան: Ինչպես, օրինակ, «Հոտաղ» ստորագրությամբ հեղինակը, «Աշխատանք» շաբաթաթերթին հղած թղթակցությունում քննադատելով այդ մեթոդի կիրառումը դպրոցներում, գրում է. «Որպես օրինակ կբերեմ Գորիսը, որն ամբողջ գաւառի կենդրոնատեղին է և քաղաք է համարում: Երկար ու բարակ վիճաբանություններով Գորիսի երիտասարդութանն յաջողեց կես-բարեխիղճ հոգաբարձուներ ընտրել: Նոքա այսպես թե այնպես գործի գլուխ անցնելով բաց արին փակած դպրոցի դռները: Երկու աշխարհական ուսուցիչների հետ գործի հրավիրեցաւ և քաղաքիս պետական դպրոցի կրօնուսույց Տէր Խորէն քահանան (խորեն քին. Մելիք-Դադայանը - Գ. Ս.):

Խօսքս պիտի կենդրոնացնեմ Տէր Հօր այն ուղղութեան վերայ, որով նա կրթում էր մեր մանուկ աշակերտներին ու աշակերտուհիներին:

Ծեծ, մագերից ու ականջներից քաշել, ժամերով չորքեցնել գետնին, կարմրեցնել ապտակների տակ, ահա տեր Թողիկի ճշմարիտ յաջորդի մանկավարժական ուղղութիւնը: Բայց դեռ անելին կասեմ: Տէր Հայրը խեղճ մանուկների վերայ իւր ուժը փորձելով հանդերձ, ցոյց է տալիս նաև իւր հայիոյանքների պաշարը»²:

Ի դեպ՝ Խորեն քին. Մելիք-Դադայանի անմիտ խստությունների մասին իր հուշերում հետաքրքրական դեպք է պատմում դպրոցի շրջանավարտ, Ա. Բակունցի դասընկերուհի Վարդանուշ Մինասյանը: Ըստ նրա՝ «Մեր դպրոցում էր սովորում Մարիամ Տէր-Մովսիսյան անուն-ազգանունով մի աղջիկ: Նա ականջներին ականջօղեր ուներ: Կրոնի դասատու Տէր-Խորենը նրան կարգադրեց հանել ականջօղերը: Մարիամը չլսեց, լուռ կախեց գլուխը և նայեց դասագրքին: Տէրտերը բարկացավ, մոտեցավ աղջկան, ուժ գործադրելով՝ պոկեց ականջօղերից մեկը: Մարիամի ականջը պատռվեց, և նա, ուշքը կորցրած, ընկավ հատակին: Երեխաների աղաղակի վրա հավաքվեցին ուսուցիչները: Մարիամին տարան ուսուցչանոց, այդտեղից էլ՝ իրենց տուն: Այս դեպքից հետո բոլորի համար ատելի էր դարձել Տէր-Խորենը»³:

Ինչպես ժամանակի առաջադեմ մանկավարժներից շատերը, այնպես էլ Ս. Տէր-Մինասյանը, աշակերտների նկատմամբ ունենալով միանգամայն բարեհաճ վերաբերմունք, խստորեն քննադատում է ավանդական դարձած Տէր-Թողիկի մեթոդը, դրա վնասաբեր հետևանքները: Դեռևս 1896 թ. գարնանը Չան-

1 Բակունց Ա., Կյորեն, Ընտրանի, էջ 414:

2 Հոտաղ [Հակոբ Տէր-Հակոբյան], Մեր գաւառի դպրոցները, «Աշխատանք», Թիֆլիզ, 1906, մայիսի 21, N 17, էջ 270:

3 Ակսել Բակունցը ժամանակակիցների հուշերում, էջ 24-25:

գեգուրում շրջագայելով՝ ազգային գործիչ, գրականագետ Նիկոլ Աղբալյանը գրում էր, որ զանգեգուրոցիներն ուսուցչի մասին ունեին հետևյալ վառ պատկերացումը. «Ուսումնական ըլի վարժապետը, որ անգին մարգարիտ ըլի՝ բնաւորութիւնը վատ էլ ընչի՞ ա պետքը, Էրեխայ թակող չըլի, դինչ ըլի, հարբեցող չըլի»¹: Հետևելով հայ մեծանուն մանկավարժ Ղազարոս Աղայանի՝ ուսուցման ու դաստիարակության գործում առաջադրած ուսանելի մեթոդներին՝ Ս. Տեր-Մինասյանը ուսուցման հաջողության հիմքը իրավացիորեն համարել է ուսուցչի կողմից իր գործը և աշակերտներին սիրելը: Իսկ «Խորհրդածություն դաստիարակության վերա» հոդվածում Ղ. Աղայանը մատնանշում էր. «Ով չգիտե, որ աշակերտը ատելով վարժապետին, ատում է և նորա ուսմունքը, որքան որ այդ օգտակար լիներ, և ընդհակառակն, պատվելով վարժապետին, սիրում է և նորա դասերը...»²:

Ս. Տեր-Մինասյանը պահանջեց ուսուցիչներից՝ չօգտագործել պատժիչ դաժան միջոցներ (ծեծ, վախ, ֆիզիկական ներգործություն և այլն), իսկ կարգապահություն ապահովել ոչ թե մարմնական պատիժների միջոցով, այլ նրանց կողմից աշակերտների նկատմամբ ցուցաբերած ազնվաբարո, համբերատար, ներողամիտ ու մեղմ վերաբերմունքի շնորհիվ: Դեռևս 1906 թ. հունիսին «Ալիք» թերթում հրատարակած «Մեր դպրոցները» վերտառությամբ հոդվածում Ս. Տեր-Մինասյանը, քննադատելով դպրոցներում տիրող արատավոր երևույթները, գրում էր. «Օրինակ կը վերցնեմ Գորիսը, որը որպէս գաւառի կենտրոն օրինակ պիտի հանդիսանայ իր շրջապատին: ...Երկու աշխարհական ուսուցիչների հետ պաշտօնի է հրաւիրում և որպէս կրօնուսոյց քաղաքիս քահանայներից մէկը:

Տեր-հայրը (խորեն քին. Մելիք-Դադայանը - Գ. Ս.) հրապարակ է բերել իր նախորդի Տեր-Թօղիկի ուղղութիւնը: Փալախկային փոխարինում է այժմ մազերից քաշքշելը, ժամերով չոքեցնելը, ապտակների տակ կարմրեցնելը, ականջներից քաշքշելը, իսկ շատ յաճախ էլ «շան-որդ»-ով, «քո հերն անիծած»-ով պատուելը: Եւ այսպէ մեր մանուկները մի տարի տանջւեցին թէ՛ ֆիզիկապէս և թէ՛ մտաւորապէս: ...Պետք է փոխել դպրոցների ներկայ դրութիւնը: Այդ է պահանջում մեր մատաղ մանուկների շահը և այդ գործի գլուխ անցածների սուրբ պարտականութիւնն է»³: Ելնելով վերոնշյալից՝ Ս. Տեր-Մինասյանը դպրոցի հոգաբարձուներին առաջարկում էր կրօնուսույցի դասերը ևս հանձնել աշխարհական ուսուցիչներին: Իր համեստ ու բարի եւթյամբ՝ Ս. Տեր-Մինասյանը դառնում է դպրոցի աշակերտների կողմից ամենասիրված ուսուցիչներից մեկը: Իսկ ժողովրդի աչքին գնալով աճում էր նրա հեղինակությունը:

Հարկ է նշել, որ Ս. Տեր-Մինասյանը միակը չէր լուսավորական իր գործունեությամբ: Նրա ակտիվ զինակիցների, համակիրների ու մշտապէս աջակցողների թվում էին ժամանակի ճանաչված մանկավարժներ Տիգրան Սազանդարյանը, Հովհ. Գրիգորյանը, Հակոբ Միրաքյանը և ուրիշներ:

Ձեռնամուկա լինելով դպրոցական գործի արդյունավետ կազմակերպման աշխատանքներին՝ գավառի ուսուցչական խմբերի միջև գործնական սերտ

1 Աղբալյան Ն., Նամակներ Չանգեգուրի գաւառից, «Մուրճ», Թիֆլիս, 1900, N 4, էջ 496:

2 Աղայան Ղ., Երկերի ժողովածու, հ. 4: Մանկավարժական երկեր, Երևան, 1963, էջ 67:

3 Վ. Հ. [Սիմեոն Տեր-Մինասյան], Մեր դպրոցները (Նամակ Չանգեգուրից), «Ալիք», Թիֆլիս, 1906, յունիսի 17, N 43:

համագործակցության հաստատելու նպատակով Ս. Տեր-Մինասյանի նախաձեռնությամբ ու գործուն մասնակցությամբ 1909 թ. նոյեմբերի 22-ին Գորիսում 13 ուսուցչի մասնակցությամբ հրավիրվում է շրջանային ուսուցչական ժողով: Ժողովը, ավարտելով իր աշխատանքները, որոշում է Չանգեզուրում բացել «Ուսուցչական միության մասնաճյուղ»: Միության վարչության անդամներ են ընտրվում Ս. Տեր-Մինասյանը, օր. Լիզա Տիգրանյանը և Տ. Սազանդարյանը: Որոշվում է նաև մոտ ապագայում հունվարյան տոներին, հրավիրել ավելի բազմամարդ ժողով՝ «...զբաղելու մի շարք կարևոր խնդիրների...» լուծման աշխատանքներով¹:

Ս. Տեր-Մինասյանը դասավանդել է հայոց պատմություն: Հայրենախոս ելույթներով ու ազգային զրույցներով երիտասարդ ուսուցիչը աշակերտների մեջ բորբոքում էր հայրենասիրության և հավատքի եռանդ, սերմանում մեծ հետաքրքրություն հայ ժողովրդի անցյալի ու ներկայի հոգևոր արժեքների նկատմամբ, ներգործուն ազդեցություն ունենալով հայրենասիրական և ազգասիրական դաստիարակության պրոցեսում: Ուշագրավ է այն իրողությունը, որ Ա. Բակունցի ուսումնառության վերջին տարում, նրա Հայոց պատմության ուսուցիչն է եղել Ս. Տեր-Մինասյանը, որի մասին իր հիշողություններում համակրանքով ու սիրով է խոսում Ա. Բակունցի դասընկեր Արմենակ Ղուկասյանը: Վերջինիս վկայության համաձայն՝ «Ակսել Բակունցի հետ ես սովորել եմ Գորիսի ծխական դպրոցում: Ինքը քաղաքի տղա էր, ես՝ Գորիս գյուղի (շենի): Երկուսս էլ պատմությունից շատ ուժեղ էինք, երևի դրա համար էլ մեր դասարանի դաստիարակ, պատմության ուսուցիչ Սիմոն [Տեր] Մինասյանը մեզ նստեցրել էր նույն նստարանին: Ալեքսանդրը գիրքը մի անգամ կարդում էր և առանց որևէ բան բաց թողնելու՝ պատմում. շատ ընդունակ էր: Համեստ էր, միշտ կոկիկ, մաքուր հագնված, շիկահեր էր, կապույտ աչքեր ուներ: Մեր ուսուցիչները՝ Հովհաննես Տեր-Գրիգորյանը², Տիգրան Սազանդարյանը, Սիմոն [Տեր] Մինասյանը և մնացյալները, որոնց ազգանունը ես հիմա չեմ հիշում, սիրում էին Ալեքսանդրին, գնահատում նրա ընդունակությունները»³:

Ա. Բակունցի՝ ծխական դպրոցում սովորելու տարիների մեկ ուրիշ դասընկեր, հետագայում ՀՍՍՌ վաստակավոր ուսուցիչ Ռուբեն Պետրոսյանն⁴ իր հուշերում վկայում է. «Ակսելը դպրոցի ամենաառաջադեմ աշակերտն էր ու փայլում էր իր բարձր ընդունակություններով և մտքի պայծառությամբ»⁵: Ա. Բակունցի՝ հատկապես հայոց պատմություն առարկան ջերմեռանդությամբ սովորելը, վկայվում է նրա 1932 թ. գրած ինքնակենսագրականում, որտեղ ասվում է.

1 Տե՛ս **Ս. [Սազանդարեան Տ.]**, Գորիս, «Գալան», Գորիս, 1909, դեկտեմբերի 5, N 1:

2 Հովհ. Տեր-Գրիգորյանը հեղինակել է «Չանգեզուրից դեպի Հին Նախիջեան (ճանապարհորդական նկատողություններ)» ուղեգրական նոթերը (տե՛ս «Նոր-Դար», Թիֆլիս, 1891, յունուարի 12, N 5, տե՛ս նաև յունուարի 17, N 7):

3 Ակսել Բակունցը ժամանակակիցների հուշերում, էջ 22:

4 Ռ. Պետրոսյանը 1936 թ. մայիսի 13-ին նշանակվել է Գորիսի ոչ լրիվ երկրորդ (7-ամյա) միջնակարգ (տե՛ս «Կարմիր Չանգեզուր», Գորիս, 1936, մայիսի 23, N 36), այնուհետև՝ 8-ամյա դպրոցների տնօրեն (տե՛ս Ռ. Պետրոսյանի ելույթը, «Գրական թերթ», Երևան, 1959, հոկտեմբերի 30, N 44): 1940-ական թթ. տնօրեն է եղել նաև N 1 միջնակարգ դպրոցում (տե՛ս «Ստալինյան դրոշով», Գորիս, 1949, մայիսի 21, N 22), ուր հետագայում դասավանդել է «Հայոց լեզու և գրականություն» (տե՛ս «Ստալինյան դրոշով», Գորիս, 1952, մարտի 8, N 11):

5 Ռ. Պետրոսյանի ելույթը, «Գրական թերթ», Երևան, 1959, հոկտեմբերի 30, N 44:

«[1]905-ին գնացել եմ ծխական դպրոցը: Գնացել եմ, այսինքն՝ իմ կամքով և իմ նախաձեռնությամբ: Սովորել եմ 5 տարի՝ հայոց լեզու, մի քիչ ռուսերեն, մի քիչ աշխարհագրություն, **բավական շատ հայոց պատմություն** (ընդգծումը մերն է՝ Գ. Ս.), և՛ երգ, և՛ վայելչագրություն»¹:

Հիրավի, ապագա գրողի ստեղծագործության մեջ զգալի տեղ է գրավել պատմական թեմատիկան: Ժամանակակիցների պատմաձևերով՝ Ա. Բակունցը մեծ հետաքրքրություն է ունեցել հայոց պատմության, պատմական տարբեր հնությունների նկատմամբ: Պահպանված տեղեկությունների համաձայն՝ դեռևս 1926 թ-ից Բակունցը զբաղվել է Տաթևի վանքի, Գլածորի ու Տաթևի համալսարանների պատմությամբ: Այդ նպատակով նա մի քանի անգամ լինում է Տաթևում, ուսումնասիրում վանքի ավերակներն ու մամռապատ արձանագրությունները²:

Դպրոցում մշտապես նշվել են ազգային տոները, ինչպես նաև կազմակերպվել են հայ գրական գործիչներին նվիրված միջոցառումներ: Ինչպես, օրինակ, «Սուրբ Վարդանանց զորավարների և 1036 վկաների» հիշատակության օրվա առթիվ 1910 թ. մարտի 25 դպրոցում կազմակերպվել է հանդես³: Նույն թվականի մայիսի 2-ին կազմակերպվել է գրական երեկո՝ նվիրված բանաստեղծ Ալեքսանդր Ծատուրյանին: Բանաստեղծի կյանքին ու գործունեությունը նվիրված զեկուցումով հանդես է եկել Ս. Տեր-Մինասյանը: «Գաւառն» օրվա առիթով գրում է. «Ամսոյս 2-ին տեղիս ծխական դպրոցում կայացաւ դպրոցական հանդես նկիրւած բանաստեղծ Ա. Ծատուրեանին: Հանդիսին ըստ պատշաճի խօսեց աւագ-ուսուցիչը: ...Յաջող էր մի քանի ոտանաւորների արտասանութիւնը»⁴:

Մեծ են Ս. Տեր-Մինասյանի ջանքերը նաև գավառում դպրոցաշինության բնագավառում: Առանձնապես նշանակալի է նրա կատարած աշխատանքը եկեղեցական-ծխական դպրոցը շենքային հարմարավետ պայմաններով ապահովելու և դրա հիման վրա մոտ ապագայում Չանգեզուրի գավառում Կենտրոնական միջնակարգ դպրոց բացելու ուղղությամբ, որն իր բարերար սերմերը պետք է սփռեր ողջ գավառով մեկ⁵: Դեռևս Վաղարշապատում աշխատած ժամանակաշրջանում Ս. Տեր-Մինասյանը Ալեքսանդրապոլում լույս տեսնող

1 **Բակունց Ա.**, Երկեր, հ. IV, Երևան, 1984, էջ 9:

2 Տե՛ս **Պետրոսյան Ռ.**, Երկու հանդիպում, «Որոտան», Գորիս, 1959, հոկտեմբերի 25, N 101, տե՛ս նաև **Իշխանյան Ռ.**, Ակսել Բակունց: Կենսագրություն և մատենագիտություն, Երևան, 1960, էջ 66:

3 Տե՛ս «Գաւառ», Գորիս, 1910, փետրւարի 21, N 8:

4 «Գաւառ», Գորիս, 1910, մայիսի 9, N 18:

5 Կենտրոնական դպրոցի շինարարությունն օր առաջ սկսելուն ձեռնամուխ Ս. Տեր-Մինասյանը նյութական աջակցության նպատակով դիմում է գորիսեցի մեծահարուստներին: Ս. Տեր-Մինասյանի հրավերով 1910 թ. ապրիլի վերջերին ծխական դպրոցի դահլիճում 30 ծխականների մասնակցությամբ տեղի է ունենում խորհրդակցություն, որի արդյունքում որոշում է կայացվում ընտրել ութ հոգուց բաղկացած «Շինարարական հանձնաժողով»՝ դպրոցի շինարարական աշխատանքները կանոնակարգելու համար: Հանձնաժողովի անդամներ են ընտրվում բժիշկ Սիք. Պարոնյանը, Արշակ Ղազարյանը, Աղ. Բաղդամյանը, Աստվածատուր Բարսեղյանը, Գ. Միրումյանը, Գ. Յոյանը, Հ. Մելքոնյանը և Մելիք քին. Օհանյանը: Խորհրդակցությունից հետո կատարված հանգանակության արդյունքում հավաքվում է 600 ռ. (տե՛ս **Վ. [Մինեոն Տեր-Մինասյան]**, Գորիս, «Գաւառ», Գորիս, 1910, մայիսի 2, N 17):

«Ժայռ» թերթում «Երկու խօսք զանգեզուրցիներին»¹ վերտառությամբ հոդվածում բարձրացրել էր այդ հարցը: «Մեր կարծիքով,- գրում էր նա,- ամենանպատակայարմարը և ամենագործնականը կլինի Գորիսում բանալ չորս դասեան, կամ հենց վեցդասեան հայկական դպրոց, որը կլինի գիւղերի ծխականների շարունակութիւնը: Այդպիսի դպրոցը դիւրութիւն կտայ գիւղացիներին իրենց որդիներին Գորիս պահել, քան Շուշի տանել, որն ունի իւր շատ և շատ անյարմարութիւնները: Ղափանցին կամ Սիսիանցին հեշտութեամբ իւր որդին Գորիսում կպահի, որովհետև նա այնտեղ ունի բարեկամներ, ծանօթներ, և վերջապէս ինքը յաճախ այնտեղ է լինում, իւր աչքով կտեսնի իւր երեխայի խերն էլ, շառն էլ: ...**Գորիսում կբացւի ծխական դպրոցից անկախ, ասածս կենդրոնական հայ դպրոցը, որը կլինի ամբողջ գաւառի սեփականութիւնը, կպահւի նորա անմիջական հսկողութեան և օժանդակութեան տակ, աշակերտների ընդունելութիւնն էլ կլինի պրօպօրցիօնալ սիստեմով** (ընդգծումը մերն է՝ Գ. Ս.)»²:

Իր նպատակի կենսագործման համար Ս. Տեր-Մինասյանը «Գաւառ» շաբաթաթերթի երեք համարներում հրապարակեց «Կենտրոնական դպրոցը» վերտառությամբ հոդվածաշարը, որում կարևորվում և հիմնավորվում էր այդօրինակ դպրոցի անհրաժեշտությունը³: «...գաւառի մեծամասնութիւնը,- գրում էր Ս. Տեր-Մինասյանը,- պաս է մնացել աւելի բարձր կրթութիւնից, նրան ակամայից բաւարարողը եղել են տարրական այն փշրանքները, որոնք տւել են գաւառի ներսի դպրոցները, այն էլ ո՞վ գիտէ ուսուցիչներին ձեռքով: Տասնեակ տարիներով մեր գաւառը զգացել է այդ պակասը, զգում է ներկայումս էլ այդ թերին, սակայն աւելի անմխիթարականն այն է, որ լռութեամբ է հանդիպում դրան, անտարբերութեան տենչով է վերաբերում դէպի այդ հարցը, դէպի իր ապագայի համար խիստ մեծ նշանակութիւն ունեցող աւելի քան կարևոր խնդիրը: Այսօր շատ փոքրիկ շրջանից խնդիրը հրապարակ է նետւել, կենտրոնական դպրոց հիմնելու գեղեցիկ միտքն է արծարծւում, որին արդէն մենք և մեզ հետ և ոչ ոք իրաւունք չունի լռութեամբ հանդիպելու, որովհետև նա գալիս է ծածկելու մեր խիստ զգալի բացը, գալիս է մի անգամ ընդ միշտ զանգեզուրցուն հանելու դժարութեան գրկից»⁴: Կառուցվելիք դպրոցի նախագծի հեղինակն էր ժամանակի հայտնի ճարտարապետ կապանցի Ղահրաման Մելիք-Ստեփանյանը⁵:

Ս. Տեր-Մինասյանի համակ ուշադրությունը միտված էր Կենտրոնական դպրոցի շինարարության վրա: Կազմակերպչական մի շարք աշխատանքներ

1 Տե՛ս **Տեր-Մինասեան Սիմ.**, Երկու խօսք զանգեզուրցիներին, «Ժայռ», Ալեքսանդրապօլ, 1908, հոկտեմբերի 2, N 74; հոկտեմբերի 5, N 75:

2 **Տեր-Մինասեան Սիմ.**, Երկու խօսք զանգեզուրցիներին, «Ժայռ», Ալեքսանդրապօլ, 1908, հոկտեմբերի 5, N 75:

3 Տե՛ս **Հեան [Սիմեոն Տեր-Մինասյան]**, Կենտրոնական դպրոցը (I), «Գաւառ», Գորիս, 1910, մայիսի 9, N 8; (II), մայիսի 16, N 19; (III), մայիսի 23, N 20:

4 **Հեան [Սիմեոն Տեր-Մինասյան]**, Կենտրոնական դպրոցը (II), «Գաւառ», Գորիս, 1910, մայիսի 16, N 19:

5 Տե՛ս «Գաւառ», Գորիս, 1910, հունիսի 19, N 23: Ղ. Մելիք-Ստեփանյանը ծնվել է (ծննդյան և մահվան թվերն անհայտ են) Կապանի Առաջածոր գյուղում: Եղբայրն էր ՀՅԴ անդամ, ազգային-ազատագրական շարժման նշանավոր գործիչ, հետագայում Կապանի ազգային խորհրդի նախագահ Սմբատ Մելիք-Ստեփանյանի: Ղ. Մելիք-Ստեփանյանը ճարտարապետի կրթությունը ստացել էր Սանկտ Պետերբուրգում: Ուսումն ավարտելուց հետո տեղափոխվել էր ծննդավայր: Հետագայում վերադարձել է Սանկտ Պետերբուրգ:

րից հետո դպրոցի շինության հիմնարկերը 1910 թ. օգոստոսի 8-ին¹ հանդիսա-

1 Գործում գտնվելու օրերին, խորեն եպս. Մուրադբեկյանը տեսակցում է ծնունդով Քարահունջ գյուղից, XIX դ. երկրորդ կեսի հայ արդյունաբերող և խոշոր բարեգործ Առաքել Աստվածատուրի Ծատուրյանի եղբոր՝ Միրզա Ծատուրյանի հետ և քննարկում վերջինիս կողմից դպրոցի շինարարությանը տրամադրվելիք ֆինանսական աջակցության հարցը: Ինչպես ասվում է խորեն եպս. Մուրադբեկյանի՝ Հայոց կաթողիկոս Մատթեոս Բ Կոստանդնուպոլսեցուն 1910 թ. օգոստոսի 21-ին հղած գրությունում, «...Գեորգիսի ծխական դպրոցը ամենաապահով և է և որ գլխավորն է սեպիական շենք չունի, հենց իմ այնտեղ եղածս ժամանակ նոր հոգաբարձուքինը մեծ դժուարությամբ բնակարան էր վարձում դպրոցի համար, որովհետև անցեալ տարուց դպրոցական շենքի տեղը այլևս չէր համաձայնում տալ իր բնակարանը: Կերոզեալ ուշադրութեան առնելով կամեցայ զարկ տալ շինութեան գործն ու խօսելով պ. Միրզա Ծատուրեանի հետ, համոզեցի նրան կատարել իր խոստումը, առանց սպասելու թե քաղաքացիները որ չափով և ե՞րբ օգնութեան կը հասնին: Բարեբախտաբար Միրզա Ապեր Ծատուրեանը չը մերժեց խնդիրս, իսկոյն յանձնեց ինձ մի հազար ռուբլի ու ստորագրութեամբ պարտաւորուեց գործը սկսելուց փոքր ինչ յետոյ երկու նուագում տալ շինութեան հոգաբարձութեանը մնացած երկու հազար ռուբլին» (ՀԱՄ, ֆ. 57, ց. 2, գ. 898, թ. 24): Ի դեպ՝ 1911 թ., երբ մահանում է Միրզա Ծատուրյանը, նրա որդիները շարունակում իրենց հոր կիսատ թողած գործը՝ ի կատար ածելով նրա «...միակ յիշատակը» (**Սագանդարեան [Տ.]**, Գորիս (համառոտակի ուսումնասիրութիւն), «Ղարաբաղ», Շուշի, 1912, յունւարի 29, N 8):

Նշենք, որ կյուբական միջոցների սղոթյան պատճառով շինարարությունը ձգձգվել է: Շինարարական աշխատանքները լայն թափ են ստացել 1913 թ. կեսերից՝ Կրաստանի և Իմերեթիայի հայոց թեմի առաջնորդ (1913 թ. հունվարի 18-1916 թ. կեսեր) Մեսրոպ արքեպս. Տեր-Մովսիսյանի հանգանակած դրամական միջոցների շնորհիվ: 1913 թ. սեպտեմբերի 25-ին առաջնորդարանում հրավիրված «Շինարարական հանձնաժողովի» նիստում որոշվում է. ա) «Շինարարական հանձնաժողովում» որպես Մ. արքեպս. Տեր-Մովսիսյանի ներկայացուցիչ ընդգրկել նրա եղբորը՝ Առաքել Տեր-Մովսիսյանին, բ) Առաքել Տեր-Մովսիսյանին ճանաչել որպես հանձնաժողովի նախագահ, գ) հանձնաժողովի անդամ Ղազար Մալինցյանին համարել «Շինարարական հանձնաժողովի» գանձապահ, իսկ Աստվածատուր Գևորգյանին՝ քարտուղար (տե՛ս Մատենադարան, Մեսրոպ Մագիստրոսի արխիվ, թղթ. 2, վավ. 124, թ. 42): Դպրոցի եռահարկ շինությունն ավարտին հասցվեց միայն 1916 թ. ամռանը (տե՛ս **ԲԵԿ** Գորիս, «Հորիզոն», Թիֆլիս, 1916, յունիսի 16, N 132):

Եկեղեցական-ծխական դպրոցի 1916-1917 թթ. ուսումնական տարվա դասընթացներն արդեն անցկացվել են նորահիմն գեղեցկաշեն դպրոցում (տե՛ս Մատենադարան, Մեսրոպ Մագիստրոսի արխիվ, թղթ. 2, վավ. 124, թ. 124, տե՛ս նաև ՀԱՄ, ֆ. 7, ց. 1, գ. 167, թ. 25-ի շրջերես): Դպրոցի հոգաբարձության խորհրդի անդամ Ղազար Մալինցյանի՝ Մ. արքեպ. Տեր-Մովսիսյանին 1916 թ. նոյեմբերի 10-ին հղած գրությունում այդ մասին ասվում է. «Հոգաբարձութեան նամակից արդեն իմանում էք, որ Ձեր խնամքով շինելիք դպրոցը յանձնել ենք Գորիսի ծխական դպրոցի հոգաբարձութեանը, որտեղ տեղադրուած են 210 երկսեռ երեխաներ: Գորիսը արդեն հրճուած է այսպիսի մի հասարակական հիմնարկութեան վերայ Ձեր շնորհիւն» (տե՛ս Մատենադարան, Մեսրոպ Մագիստրոսի արխիվ, թղթ. 2, վավ. 124, թ. 143): Գորիսի հասարակության անունից դպրոցի հոգաբարձուների խորհրդի նախագահ Խուրշուդ Մելիք-Օհանյանի և ավագ ուսուցիչ Արշակ Առատյանի՝ դպրոցի բարերար Մ. արքեպ. Տեր-Մովսիսյանին Շուշիում լույս տեսնող «Փայլակ» լրագրի միջոցով հայտնած երախտագիտության խոսքում ասվում էր. «Թոյլ տւեք ձեր յարգելի թերթի միջոցով Գորիսի հայ հասարակութեան կողմից մեր երախտագիտական խորին շնորհակալութիւնները յայտնել Թիֆլիզի թեմի նախկին առաջնորդ գերապատիւ տ. Մեսրոպ եպիսկոպոսին, որի անողով ջանքերի շնորհիւ քաղաքումս կառուցուած և արդեն պատրաստ է 40.000 ռուբլիանոց մի փառաւոր դպրոցական շինութիւն և յայտնուած է, որ դպրոցիս յայտկացուած է նաև անձեռնմխելի մեծ գումար» (Նամակ խմբագրութեան: Գորիս, 12 հոկտեմբերի, «Փայլակ», Շուշի, 1916, հոկտեմբերի 20, N 80):

Հիրավի, շենքն ունեցել է գեղեցիկ տեսք: Ինչպես նկարագրել է Տ. Սագանդարյանը. «Շենքը վեհ և գեղեցիկ տպաւորութիւն է թողնում նայողի վրա, և իսկապէս քաղաքի առաջին շենքը դպրոցը պէտք է լինի. գեղեցիկ, մեծ, յարմար և փարթամ» (**Սագ-եան**, Տեղեկատու Չանգեզուրի, «Մշակ», Թիֆլիս, 1915, դեկտեմբերի 16, N 278): Մեսրոպ արքեպ. Տեր-Մովսիսյանը, 1934 թ. փետրվարի 2-ին Մայր Աթոռ Ս. Էջմիածնի Գերագույն հոգևոր խորհրդին հղած գրությունում թվարկելով իր կատարած ձեռնարկները, գրում է. «Ունեն շինարարական մնայուն կարելոր գուտ կուլտուրական եւ տնտեսական ձեռնարկներ: ...Չանգեզուրի գլխավոր Գորիս քաղաքում խիստ մեծ եռյարկան դպրոցական շինութիւն...» (**Տեր-Վարդանեան Գ.**, Մեսրոպ Մագիստրոս արքեպիսկոպոս Տեր-Մովսիսեան: Կենսագրործունեութիւնը: «Ընդհանուր ցուցակ հայերեն ձեռագրաց», մատենագիտութիւն, Երեւան, 1999, էջ 28):

Շինության ավարտից հետո այդտեղ են ցանկացել իրենց հետագա ուսումը շարունակել նաև շրջակա գյուղերի աշակերտներից շատերը: Ինչպես, օրինակ, Տաթևի փոխանորդության

վոր Սուրբ պատարագից հետո կատարում է պաշտոնական այցով Գորիսում գտնվող Երևանի թեմի փոխառաջնորդ Խորեն Եպս. Սուրադբեկյանը¹: «Գալառ» շաբաթաթերթն օրվա առիթով տեղեկացնում էր. «Այսօր հանդիսաւոր պատարագից յետոյ Երևանի փոխ-թեմակալ բարձրապատիւ Խորեն վարդապետ Սուրադբեգեանը մասնակցութեամբ տեղական քահանայական դասի և ժողովրդի, կկատարի Կենտրոնական դպրոցի հիմնադրութիւնը»²:

Առաջ անցնելով կշեք, որ նախքան Կենտրոնական դպրոցի շինութեան ավարտը, 1911-1912 թթ. ուսումնական տարվանից դպրոցը տեղավորվել էր «Պասսաժի» խանութների մեջ³, որը 1910 թ. սկզբներին դեռևս գտնվում էր կիսաշեն վիճակում⁴: Երևանի թեմի 1911-1912 թթ. ծխական դպրոցների տեղեկագրում Գորիսի դպրոցի շենքային պայմանների մասին ասվում է. «Շենքը սեպհական չէ, անյարմար, բաղկացած է 3 սենեակներից»⁵: «Գորիսի դպրոցը,- գրում է Տ. Սազանդարյանը,- տեղաւորւած է շուկայի կենտրոնում, նորաշէն պասսաժի իրար կից 7 խանութների մէջ: Խանութներ ասելով, արդէն ամեն ինչ հասկանալի է. դասարանները չունին պատուհաններ, լոյսը ընկնում է ապակեծածկ դռներով, որտեղից ել ու մուտք են անում: Օդի մաքրութիւն ասած բանը գոյութիւն չունի: Պատշգամ, միջանցք գոյութիւն չունին, բացօդեայ տեղից մտնում են դասարան, խանութ: Դպրոցը չունի բակ, այլ հրապարակ է, ճանա-

դպրոցական տեսուչ Հ. Ղարաբեկյանի` Երևանի թեմի փոխթեմակալին 1917 թ. հունվարի 10-ին հղած զեկուցագրում Գորիս գյուղի (Նոր կամ Ներքին Գորիս) ծխական դպրոցի աշակերտների թվի նվազման պատճառի մասին ասվում է. «Գորիս գիւղի դպրոցի սաների թվի փոքրութեան պատճառը թէ նոր բացւած միևնույն տարածական դպրոցներն են քաղաքում և թէ մասնաւանդ քաղաքի ծխ.[ական] դպրոցը, որի նոր շինութիւնը դէպի իրեն է գրաւել ոչ միայն գիւղի ծխ.[ական] դպրոցի աշակերտներին, այլ նոյն իսկ միևնույն տարածական դպրոցների աշակերտներից» (տե՛ս ՀԱՄ, ֆ. 48, ց. 1, գ. 451, թ. 22):

Շինութեան երրորդ հարկում գործել է Գորիսի թատրոնը: Ինչպես վկայում է Ս. Խանադյանը. «...երրորդ հարկում շատ մեծ դահլիճ կա` մեծ բեմով ու մի քանի նախասրահներով: Այս սրահին մենք ուղղակի «թատրոն» ենք ասում: Առաջներում այդտեղ շատ ներկայացումներ են տվել» (**Խանադյան Ս.**, Հորս հետ և առանց հորս, էջ 168):

Հետագա տարիներին շենքը ծառայել է տարբեր նպատակների: 1924 թ. փետրվարի 9-ից շենքում գործել է «Լուկաշինի» անվան 7-ամյա, այնուհետև նրա հիմքի վրա ստեղծված լրիվ միջնակարգ, ապա երկրորդ 7-ամյա, այնուհետև` 8-ամյա դպրոցները (տե՛ս «Կարմիր Չանգեզուր», Գորիս, 1936, մարտի 11, N 16, տե՛ս նաև **Գիշուկ Ռ.**, Ուսուցիչների ջանասեր աշխատանքի շնորհիվ, «Ստալինյան դրոշով», Գորիս, 1952, մարտի 30, N 14, տե՛ս նաև **Օհանջանյան Հ.**, Քննությունները ընթանում են հաջող, «Ստալինյան դրոշով», Գորիս, 1952, յունիսի 1, N 31): Ի դեպ, վերջին դպրոցի հիմքի վրա 1952-1953 թթ. ուս. տարում բացվել է քաղաքի N 2 միջնակարգ դպրոցը (տե՛ս «Սյունյաց երկիր», Կապան, 2011, մայիսի 28, N 10):

Շենքը քանդվել է 1970-ական թթ. սկզբներին: Շինութեան անմիջապես ետևամասում Խորենացի փ. N 53 հասցեում ներկայումս կանգուն է «Գորիս» հյուրանոցը, որի կառուցման ժամանակ հողածածկվել են շինութեան հիմնապատերն ու կառույցի կիսաքանդ մնացորդները: Հյուրանոցի սեփականատեր Սենիկ Ջուլիակյանի նախաձեռնությամբ 2018 թ. ապրիլին իրականացված հողափորման մեծածավալ աշխատանքների արդյունքում կրկին բացվել են շինութեան հիմնապատերն ու կիսաքանդ կառույցները: Ըստ նախագծի` հնավայրում պետք է ստեղծվի պատմաազգագրական թանգարան:

1 Խորեն վրդ. Սուրադբեկյանը Երևանի թեմի փոխառաջնորդ է կարգվել 1908 թ. դեկտեմբերի 13-ին (տե՛ս ՀԱՄ, ֆ. 56, ց. 1, գ. 10956, թ. 1, տե՛ս նաև «Ախուրեան», Ալեքսանդրապոլ, 1909, դեկտեմբերի 5, N 85):

2 «Գալառ», Գորիս, 1910, օգոստոսի 8, N 29:

3 Տե՛ս **Սազանդարեան [Տ.]**, Մեր դպրոցը (II), «Ղարաբաղ», Շուշի, 1912, յունևարի 19, N 5:

4 Տե՛ս **Սազանդարեան [Տ.]**, Մեր քաղաքի վարիչների քառամեայ գործունեութիւնից, «Գալառ», Գորիս, 1910, յունևարի 24, N 4:

5 ՀԱՄ, ֆ. 7, ց. 1, գ. 157, թ. 1:

պարհ, այն էլ բոլորի համար: Մանկավարժութիւնը, որքան էլ բարձր հիմունքներով տարւի այսպիսի անյարմար դպրոցական շէնքում, այնուամենայնիւ ոչ մի արդիւնք չի տալ»¹:

Ս. Տեր-Մինասյան հմուտ ու բանիմաց մանկավարժի համբավը, դուրս գալով Չանգեզուրի գավառի շրջանակներից, արդեն արժանացել էր համաժողովրդական ճանաչման: Երևանի թեմական խորհուրդը հաշվի առնելով Ս. Տեր-Մինասյանի արդյունավետ գործունեությունը ավագ ուսուցչի պաշտոնում 1910 թ. օգոստոսի սկզբներին նրան նշանակում է Երևանի թեմի ծխական դպրոցների տեսչների (թեմն ուներ երկու տեսուչ) օգնական², որի գործունեությունը կենտրոնացած էր թեմի երրորդ մասում Չանգեզուրի գավառում³:

1910-11 ուսումնական տարվանից դպրոցի ավագ ուսուցչի պաշտոնում Ս. Տեր-Մինասյանին փոխարինում է Սարգիս Սիմոնյանը (1905 թ. ավարտել էր Գևորգյան ճեմարանը, ապա՝ Ներսիսյան դպրոցի VII դասարանը)⁴: Նույն ուսումնական տարում դպրոցը եղել է հնգամյա երկսեռ. սովորել է 124 աշակերտ (55 տղա, 69 աղջիկ)⁵, ունեցել է 200 կտոր գրքից բաղկացած գրադարան⁶: Ուսուցչական կազմն էր՝ Ս. Սիմոնյան, Աշխեն Մելիք-Շահնազարյան (ավարտել է Թիֆլիսի օրիորդաց գիմնազիան), Փիրուզա Ժամհարյանը (ավարտել է Շուշիի կարունձևի դպրոցը), Տիգրան Սազանդարյանը (1903 թ. ավարտել է Էջմիածնի Գևորգյան հոգևոր ճեմարանը) և Հովհաննես Գրիգորյանը (ավարտել է Շուշիի քաղաքային դպրոցը)⁷: Դպրոցի հոգաբարձուներն էին՝ Ղազար Մալինցյանը, Նիկողայոս Հովսեփյանը, Ջումշուդ Տեր-Մովսիսյանը, Գալուստ Բաղիրյանը և Գևորգ Պալասանյանը⁸:

Ավագ ուսուցչի պաշտոնում Ս. Սիմոնյանին հաջորդել է Հակոբ Խանլարյանը (ավարտել է Շուշիի թեմական դպրոցը)⁹: 1911-1912 ուսումնական տարում դպրոցը դեռևս չի ունեցել սեփական շինություն: Նույն թվականին դարձել է քառամյա, ուր սովորել են 111 աշակերտ (44 տղա, 67 աղջիկ)¹⁰: Գրադարանն ունեցել է 300 կտոր գիրք: Դպրոցի ուսուցիչներն էին Հովհաննես Գրիգորյանը և Տ. Սազանդարյանը¹¹: Դպրոցի հոգաբարձուներն էին Ղազար Մալինցյանը, Նիկողայոս Հովսեփյանը, Ջումշուդ Տեր-Մովսիսյանը, Գալուստ Բաղիրյանը և Գևորգ Պալասանյանը¹²: 1913-14 ուսումնական տարում դպրոցը եղել է հնգամ-

1 Սազանդարեան [Տ.], Մեր դպրոցը (II), «Ղարաբաղ», Շուշի, 1912, յունևարի 19, N 5:

2 Տե՛ս ԱԼԵՏԻՍԵԱՆ Մ., Թեմական տեսուչ, «Աշխատանք», Երևան, 1916, մայիսի 7, N 2:

3 Տե՛ս «Գաւառ», Գորիս, 1910, սեպտեմբերի 19, N 34, տե՛ս նաև Գ. Ղ. [Գրիգոր Ղարազոյցյան], Սիմեոն Տեր-Մինասեան, «Նոր դպրոց», Թիֆլիս, 1912, յունիս, N 21-24, էջ 118-119:

4 Տե՛ս նույն տեղում, տե՛ս նաև ՀԱՍ, ֆ. 7, ց. 1, գ. 156, թ. 31-ի շրջերես:

5 Տե՛ս Ակսել Բակունցի տուն-թանգարան, գիտաօժանդակ ֆոնդ, փ. դ. 402, տե՛ս նաև ՀԱՍ, ֆ. 7, ց. 1, գ. 156, թ. 31-32:

6 Տե՛ս նույն տեղում, տե՛ս նաև ՍԻՆԵՑԻ ԼԵՆՆ [Միքայելյան ԼԵՆՆ], Գորիս, «Հորիզոն», Թիֆլիս, 1910, փետրվարի 19, դ. 39:

7 Տե՛ս ՀԱՍ, ֆ. 7, ց. 1, գ. 156, թ. 31-ի շրջերես, տե՛ս նաև ՀԱՍ, ֆ. 7, ց. 1, գ. 157, թ. 1:

8 Տե՛ս ՀԱՍ, ֆ. 7, ց. 1, գ. 157, թ. 1:

9 Տե՛ս ԵՏԱՅԵԱՆ Մ., Մեծապատիւ մուրացկանները, «Փայլակ», Շուշի, 1915, մայիսի 10, N 18: Հ. Խանլարյանը նախքան այդ, ուսուցիչ է աշխատել է Շուշիում (տե՛ս «Փայլակ», Թիֆլիս, 1907, ապրիլի 28, N 14):

10 Տե՛ս ԽՈՒՂՈՅԱՆ Ս., նշվ. աշխ., էջ 119:

11 Տե՛ս ՀԱՍ, ֆ. 7, ց. 1, գ. 157, թ. 1:

12 Տե՛ս նույն տեղում:

յա և ունեցել է 106 աշակերտ (44 տղա, 66 աղջիկ), 4 ուսուցիչ¹: Ոսուցիչներն էին Հակոբ Խանլարյանը, Աշխեն Մելիք-Շահնագարյանը, Սարթենիկ Բաբայանը (ավարտել է Ալեքսանդրապոլի օրիորդաց գիմնազիան), Արշակ Առստամյանը (ավարտել է Շուշիի թեմական դպրոցը) և Գրիգոր Պալյանը²: Նույն թվականին հոգաբարձուներն էին Ղազար Մալինցյանը, Դավիթ Խուրշուդյանը, Հակոբ Միրաքյանը և Արտեմ Սարգսյանը³:

1914-15 ուսումնական տարում դպրոցն ունեցել է 126 աշակերտ (57 տղա, 69 աղջիկ). դասավանդել է 5 ուսուցիչ⁴: 1915-16 ուսումնական տարում եղել է եռամյա և ունեցել է 107 (48 տղա, 59 աղջիկ) աշակերտ և 4 ուսուցիչ⁵: Նույն ուսումնական տարում դպրոցում դասավանդել են Հակոբ Խաչատրյանը (ավարտել է Շուշիի թեմական դպրոցը), Արշակ Առստամյանը, Աշխեն Մելիք-Շահնագարյանը, Չարուհի Մինասյանը (ավարտել է Բաքվի կարունձևի դպրոցը)⁶: Դպրոցի հոգաբարձուներն էին Խուրշուդ Մելիք-Օհանյանը, Իսաջան Պողոսյանը, Արամ Պարոնյանը և Կարապետ Մելիք-Օհանյանը⁷:

1916-1917 թթ. ուսումնական տարվանից դասերն արդեն անցկացվել են հատուկ այդ նպատակով կառուցված եռահարկ շինության մեջ⁸: Նույն ուսումնական տարում դպրոցը եղել է 4-ամյա՝ 202 աշակերտով (95 տղա, 107 աղջիկ)⁹: Դպրոցի հոգաբարձության նախագահն էր Խուրշուդ Մելիք-Օհանյանը, ավագ ուսուցիչը՝ Արշակ Առստամյանը¹⁰:

Երկրում ծայր առած ռազմաքաղաքական իրադարձությունների հետևանքով 1917-1918 թթ. ուսումնական տարում դպրոցը չի գործել: Վերաբացվել է Հայոց անկախ պետականության վերականգնումից հետո (1918 թ. մայիսի 28), երբ Հայաստանի խորհուրդը 1918 թ. սեպտեմբերի 11-ին ընդունեց «Դպրոցի կառավարման մասին» օրինագիծը՝ 1919 թ. մայիսին ընդունած որոշումներով: Հանրային կրթության նախարարությունը նախատեսում էր բացել տարրական և միջնակարգ դպրոցներ¹¹: 1919 թ. հունիսի 7-ին Հանրային կրթության նախարարի պաշտոնակատար Սիրական Տիգրանյանը միջնորդում է ՀՀ կառավարությանը ծրագրել միջնակարգի վերածել Գորիսի, Վաղարշապատի, Աշտարակի, Իգդիրի, Նոր Բայազետի, Ագուլիսի և այլն (ընդամենը՝ 12) ծխական դպրոցները՝ տարեկան մի նոր դասարան ավելացնելով¹²: 1919 թ. սեպտեմբերից, երբ Հանրապետությունում պետականացվեցին եկեղեցական-ծխական

1 Տե՛ս ՀԱԱ, ֆ. 7, ց. 1, գ. 162, թ. 27-28, տե՛ս նաև ՀԱԱ, ֆ. 7, ց. 1, գ. 163, թ. 8:

2 Տե՛ս ՀԱԱ, ֆ. 7, ց. 1, գ. 162, թ. 28:

3 Տե՛ս նույն տեղում:

4 Տե՛ս ՀԱԱ, ֆ. 48, ց. 1, գ. 417, թ. 5:

5 Տե՛ս ՀԱԱ, ֆ. 7, ց. 1, գ. 165, թ. 24-25:

6 Տե՛ս նույն տեղում, թ. 24:

7 Տե՛ս նույն տեղում, թ. 25:

8 Տե՛ս Մատենադարան, Մերոպ Մագիստրոսի արխիվ, թղթ. 2, վավ. 124, թ. 124, տե՛ս նաև ՀԱԱ, ֆ. 7, ց. 1, գ. 167, թ. 25-ի շրջերես:

9 Տե՛ս ՀԱԱ, ֆ. 48, ց. 1, գ. 451, թ. 23:

10 Տե՛ս Նամակ խմբագրութեան: Գորիս, 12 հոկտեմբերի, «Փայլակ», Շուշի, 1916, հոկտեմբերի 20, N 80:

11 Տե՛ս **Իրագել [Հակոբ Տեր-Հակոբյան]**, Հարկաւոր է շտապել, «Ձանգ», Երևան, 1918, սեպտեմբերի 24, № 56, տե՛ս նաև **Ռաշմաճեան Տ.**, Պետք է բաց անել բոլոր տիպի դպրոցները, «Ձանգ», Երևան, 1918, հոկտեմբերի 2, № 58, տե՛ս նաև **Վարդանյան Գ.**, Մշակույթը Հայաստանի առաջին Հանրապետությունում (1918-1920 թթ.), Երևան, 2003, էջ 9-10, 25:

12 Տե՛ս Կառավարութեան որոշումներ, «Աշխատանք», Երևան, 1919, յունիսի 14, N 32:

բոլոր դպրոցները¹, 1920 թ. սկզբներին Գորիսում արդեն գործում էր Ա աստիճանի (տարրական) 2 դպրոց²:

Այսպիսով՝ ընդհանրացնելով Գորիսի Սբ. Հռիփսիմեի եկեղեցական-ծխական դպրոցի գործունեությունը, նշենք, որ այն անգնահատելի դեր է ունեցել ոչ միայն Գորիսի, այլև ամբողջ գավառի կրթամշակութային կյանքում:

1 Օրենսդրորեն ամրագրվել է 1920 թ. մարտին (տե՛ս **Վարդանյան Գ.**, Մշակույթը Հայաստանի առաջին Հանրապետությունում (1918-1920 թթ., էջ 38, 39):

2 Տե՛ս «Սիւնիք», Գորիս, 1920, փետրվարի 15, № 6: Տեղին է հավելել, որ Հայաստանում խորհրդային կարգերի հաստատումից հետո, երբ ստեղծվեց կրթական նոր համակարգ, ՀԽՍՀ ժողովրդի համար 1921 թ. սեպտեմբերի 21-ին ընդունեց դեկրետ՝ անգրագիտության վերացման մասին: Որոշում ընդունվեց՝ հանրապետությունում ունենալ երկաստիճան դպրոց՝ տարրական և 7-ամյա: Չանգեզուրի գավառում Բ աստիճանի (7-ամյա) դպրոց բացելու անհրաժեշտության մասին Գավառոձկոմի դպրոցական ենթաբաժնի վարիչ Մելիքսեթ Եսայանի՝ Գավառաբաժնի վարիչին 1923 թ. օգոստոսին հղած գեղուցագրում ասվում էր. «Չանգեզուրը կարիք ունի 2-րդ աստիճանի մի դպրոցի: Տարիներ առաջ ծխական և տարրական դպրոցները ավարտած բազմաթիվ աշակերտ-աշակերտուհիներ թափառում են փողոցներում, որովհետև միջոցներ չունեն իրենց կրթությունը շարունակելու երևանում, Թիֆլիսում, Բաքվում: ...Անցյալ ուսումնական տարվա սկզբին լուսժողովուհի ներկայացուցիչ ընկեր Կարապետ Մելիք-Օհանջանյանը հատուկ ուշադրության առարկա էր դարձրել այդ հարցը, անգամ սկսել էր վերանորոգել Չանգեզուրի նախկին կենտրոնական վարժարանի շենքը, բայց նրա երևան մեկնելու և նյութեղենի ու նյութական միջոցների պակասության պատճառով սկսված աշխատանքները կանգ առան» (**Գրիգորյան Ռ.**, Դափանի գավառակային լուսբաժնի առաջին քայլերը (1921-1922 թթ.), ԲՀԱ, Երևան, 1969, N 2, էջ 58):

ՀԿԿ կենտկոմի քարտուղար և ՀՍԽՀ ժողովրդի նախագահ Սարգիս Լուկաշին-Սրապիոնյանի 1923 թ. օգոստոսի 31-ին Գորիս կատարած աշխատանքային այցից հետո Չանգեզուրի գավառոձկոմի 1923 թ. դեկտեմբերի որոշմամբ նախկին Կենտրոնական դպրոցում բացվում է Բ աստիճանի (7-ամյա) դպրոցը, որտեղ իրենց հետագա ուսումը պետք է շարունակեին Ա աստիճանն ավարտած դպրոցների սաները (տե՛ս ԸՆԿ. Լուկաշինը Չանգեզուրում, «Կարմիր ռաշչպար», Գորիս, 1923, սեպտեմբերի 6, № 21, տե՛ս նաև **Ամիրյան Ս.**, Լուսավորության խնդիրը Չանգեզուրում, «Կարմիր ռաշչպար», Գորիս, 1923, դեկտեմբերի 22, № 31): Ս. Լուկաշինի կարգադրությամբ Չանգեզուրի գավառոձկոմի ջանքերով սեպտեմբերի 15-ից մինչև 1924 թ. հունվարի 15-ը «...նախկին կենտրոնական վարժարանի (իմա՝ Սբ. Հռիփսիմե ծխական դպրոցը - Գ. Ս.) շենքի առաջին հարկն ամբողջովին հիմնական վերաշինության է ենթարկվել...», որտեղ 1924 թ. փետրվարի 9-ից բացվում է Ս. Լուկաշինի անվան 7-ամյա դպրոցը (տե՛ս ՀԱՄ, ֆ. 122, ց. 1, գ. 472, թ. 54, 70):

1933-1934 թթ. ուսումնական տարում դպրոցը դարձել է լրիվ միջնակարգ (10-ամյա): Ցուցաբերած բարձր ցուցանիշների համար 1935-1936 թթ. ուսումնական տարվանից դպրոցը համարվել է օրինակելի N 1 միջնակարգ դպրոց (տե՛ս «Կարմիր Չանգեզուր», Գորիս, 1936, հունվարի 27, N 5, տե՛ս նաև մայիսի 23, N 36, տե՛ս նաև «Ստալինյան դրոշով», Գորիս, 1938, մայիսի 30, N 39): Մուշեղ Ադունցի տնօրինության օրոք, 1935-1936 թթ. ուսումնական տարում, դպրոցը տվել է անդրանիկ միջնակարգ շրջանավարտը (տե՛ս **Ադունց Մ.**, Ինչպես ենք նախապատրաստվում քննություններին, «Կարմիր Չանգեզուր», Գորիս, 1936, մայիսի 21, N 35): Տևորեն Ռուբեն Պետրոսյանի օրոք 1940 թ. սեպտեմբերի 1-ից դասերն անցկացվել են ներկայիս Ա. Բակունցի անվան դպրոցի տեղում կառուցված շինությունում (տե՛ս **Հախվերդյան Ս.**, Գորիսի ամփոփ պատմություն, էջ 318):

Գորիսի շրջխորհրդի գործադիր կոմիտեի՝ 1956 թ. սեպտեմբերի 28-ի որոշմամբ դպրոցն անվանակոչվել է մեծանուն արձակագիր Ակսել Բակունցի անունով: Որոշման մեջ ասվում է. «Հաշվի առնելով այն հանգամանքը, որ սովետահայ նշանավոր գրող Ակսել Բակունցը ծնվել է Գորիս քաղաքում, ավարտելով ուսումը՝ երկար տարիներ որպես ուսուցիչ աշխատել է Չանգեզուրի տարբեր վայրերում, իսկ հետագայում որպես գրող՝ նրա գրական ստեղծագործությունների համար նյութ են ծառայել հիմնականում Գորիսի շրջանի բնաշխարհը, նրա անցյալն ու առօրյան, և երբ նա իր գրական ժառանգությամբ խոշոր ներդրում է արել սովետահայ գրականության մեջ, աշխատավորների դեպուտատների Գորիսի շրջանային Սովետի գործկոմը որոշեց Գորիսի N 1 միջնակարգ դպրոցը և Տախտակներ թաղամասի կենտրոնական փողոցը կոչել **Ակսել Բակունցի** անվամբ» (Շրջսովետի գործկոմում, «Որոտան», Գորիս, 1956, սեպտեմբերի 30, N 80): Դպրոցի ներկայիս հասցեն է՝ Անկախության փ. 64 շենք:

THE BEGINNING OF EDUCATIONAL ACTIVITIES IN GORIS : FROM THE HISTORY OF ST. HRIPSIME PARISH SCHOOL (1890-1920) - GEVORG STEPANYAN - In the center of Zangezour province, Goris, St. Hripsime Church and Parish Two-Years School For Boys was founded in 1890-1891 semester. Since its founding the school was engaged exceptionally in patriotic activities educating many children. School's activity has been put on certain regulated basis when Goris-born pedagogue, publisher, editor and journalist Simeon Ter-Minasyan was the senior teacher there. The school played a valuable role in the educational and cultural life of not only Goris, but of whole province.

ЗАРОЖДЕНИЕ ОБРАЗОВАТЕЛЬНОЙ ДЕЯТЕЛЬНОСТИ В ГОРИСЕ. ИЗ ИСТОРИИ ПРИХОДСКОЙ ШКОЛЫ ЦЕРКВИ СВ. РИПСИМЕ (1890-1920 ГГ.) - ГЕВОРГ СТЕПАНЯН - Приходская школа для мальчиков церкви Св. Рипсима провинциального центра Зангезура Гориса была основана в 1890-1891 учебном году. Сразу после учреждения школа занялась исключительно патристической деятельностью, дав образование и воспитание многочисленным школьникам. Деятельность школы была получила регламентированный характер, когда там в качестве старшего преподавателя преподавал родом из Гориса педагог, издатель, редактор и журналист Симеон Тер-Минасян. Школа сыграла неоценимую роль в образовательной и культурной жизни не только Гориса, но и всей области.